


KWALULWABUBANA 4

 Mulongo Neville, kabiji byepi mute, mabaanga, nangwa byonkabyo, ku balunda betu bawama, tuji bingi na lusekelo pakubwela kuno ku kipwilo bufuku buno. Kwakaba pacheche, kabiji nanchi tusakweseka kupelawizhako, kuya mu Mbila.

Patanshi, tuji na byakubijika, kabiji ne—kya kukabila kyapusanako. Amiwa njina makalata kunyuma kokwa, a kupewa, kabiji ne nyenga ao ubena kumvwa mba uji na kitumbwa ku bongo. Kabiji kwajinga ne mukwabo ku Louisville; kabiji ne mukwabo mulongo wa musapwishi, bashanji bajinga na kikola kya muchima; kabiji kuji bavula, bantu bavula bingi mu ino ntanda leelo. Bavula babena kwituntumina kabiji kine twibalombelela na muchima wetu yense, amba Lesa usakwitukwasha.

Javula pepi nobe naite-faivi paseti wa mwingilo wami kimye kyonse ke wakuuba mba, wakulombelela bakolwa, mwamona, bino Ami—Amiwa njipo na—musango mucheche wapusanako wa kuuba mba...Amiwa kilombelela bakolwa, bino, vulukai kyokyo. Akyo kiyatu kulutwe nakyo. Bino, oo, inge twakonsha kwikala na—na kipwilo kyaikajikwa mukifulo kyakyo, kabiji, twaikala mundoonda pakuuba mba twingile, mwamona. Mwinengezha pamo, monai, mwaleta bintu byonse pamo.

Kintu kimo kyajikwiyatu ku muchima wami, bimye bicheche byapitapo. Akyo kyo kimye umo mucheche mukote wapitamo kala, mukoko wanjii umo pepitu na kuchibiwako, kuulu pepitu na kuchibiwako. Aye kechi uji muno pakuuba mba atelekeko ne. Bino aye mfumu wakine mulunda, wa jizhina ja Roy Roberson, kabiji umo tulasiti muno mu kipwilo, kabiji umo Mwinakilishitu wawama mwanamulume. Aye wajikwimanatu byobya, ne kwamba mba, “Mulongo Branham, kechi mulubeko Ndamakyaalo ne.” Wajikwamba mba, “Kyajikung’umvwisha bingi bibi byo akwimana,” wakumona pa televizhonyi, “aye kasa abena kwikila kufuma mundeke, mipolo kasa ipompoloka pa mabuta anji, kabiji ne kyatunwa kyanji kasa kyasendama lubaji lumo.” Mwayukatu, aye wajinga ponkapa ne Roy ne bakwabo, mu—muyoya nkondo.

Kechi oene mambo ne nangwa mwapusana nanji mu byabumulwila ntanda, aye ye Ndamakyaalo wetu. Ee, mwane. Kwi amiwa, Amiwa—Amiwa kechi ne Democrat nangwa Republican ne. Amiwa ne Mwinakilishitu. Bino Amiwa—Amiwa ne mubuula, Amiwa kine najinga nakukomoka kwabaya bingi kwa—kwa Ndamakyaalo Dwight Eisenhower. Mwane, aye kine wajinga muntu umo mukatampe, mwaila milanguluko ya—

yami. Inge wa bwelelengapo ne jikwabo, kabiji Amiwa naikala wa kuvota, Nakonsha kumuvotela jibiji. Abyo ibyo. Amiwa kechi natako muchima nangwatu wajinga—nangwatu wajinga na myaka aduleendi, Amiwa nafwainwa ku muvotela jibiji, mambo Amiwa namutemwa. Kabiji twayai tumuvuluke mu milombelo yetu bufuku buno.

J. T., Amiwa kine nasachila yoya mpwijilo yawama, anweba bonse, obewa ne Mulongo Willard yo mwajinga nayo uno mulungu. Inge Natwelelemo kufumina pangye, anweba bonse mwaambile mba, “Kijitu bulongo, Mulongo Branham pano, mwayukatu, *kikananga-ne-kikananga*.” Bino kyawamatu kwimana pangye ne kuteleka kwi obewa, kechi mwamona nenyi? Kijitu bulongo. Nanchi, kyawama bingi.

Amiwa njina lwito ku bipwilo bimo, inge anweba mubena kwibakeba bonse, inge anweba mwinengezha kuya ku mwingilo wabu kafunga, inge mwafunjishiwa. Kabiji, akyo, Naketekela mba muji nakyo, kabiji anweba bonse mwaikajikwa. Amiwa njina kimo mu Oregon, kimo mu Washington, California, ne Arizona, kabiji ne mampuzha apusanapusana. Kabiji inge mubena kukeba kusenda kipwilo nangwa kiji kyonse, kika, ponkapano po paji kifulo kyawama kya kutatwilapo, ponka pano. Kabiji kuji myeo ibena kujila konse konse, ne mampuzha abena India kabiji ne konse ko mukeba kuya. Mwambulatu nayuka, mambo Naketekela mba anweba bansongwalume mwaikajikwa pa kino kimye. Abyo ibyo. Natemwa kwibamona kasa boba kyokya.

Kuji Mulongo Ruddell kokwa uji mujishinda. Ubena kuya ku mbung’eno yanji, mu mobatu acheche. Ubena kuya nakwikala na kusangululwa, Mulongo Ruddell byo abena kuuba. Kabiji Na—Navuluka Amiwa na mutwalanga mulongo mucheche konse konse, na kweseka kumufumya mu kikokoji amba asapwile. Aye wajinga lunyuma bingi. Aye wakonsheshe kwamba mba, “Amiwa kuuba naamba ne.” Mwakonsha kumumvwa. Amena. Mwamona? Anweba kechi mwayuka kyo mwafwainwa kuuba ne inge mwaswisha Mupashi Wazhila wimukwata. Abyo ibyo.

Kabiji Mulongo Graham Snelling mu Utica, kabiji Mulongo Junior Jackson kulutwe kokwa. Atweba—atweba twibamona bonse mba bipwilo byetu bya bicheche, byo tuji nabyo. Atweba bonse tujitu pamo. Atweba kechi twipachika pa lufunjisho lwetu ne, nangwa luketekelo lwetu ne po twaimena, mafunjisho etu, ajitu pamo. Twaimana pamo, bintu byonse tuji pamo. Atweba twi kipwilo kimotu. Kabiji twakonsha kutemwa kuuba mba byapalang’ana konse konse; tuji na bimo mu Africa, bimo mu India, kabiji ne kuzhookoloka, kyaalo kyonse. Akwa iko ko tubena kwibakeba, na kusalang’anya ma Sawakya.

Kabiji Namona babo balongo bakitwala babena kwiya, nobe biji Mulongo J. T. Parnell kuno, kabiji—kabiji Mulongo

Willard ne bakwabo, mu kimye kyo babena kwiya, balunda bakitwala, Amiwa byo mbena kuya nakukoma. Inge kuji ja keesha, bakekala banabalume ba keesha. Amiwa kechi mbena kukeba ino Mbila kufwa ne. Kechi yakonsha ne. Yafwainwa kutwajijila. Kabiji Amiwa kechi naketekela mba tuji na kimye kyabaya kya Kwiiletelamo ne.

Awa mwaana mucheche ye baambile mba usa kufwa, Namona mba mwajinga naji juba jonse leelo, nyenga. Akyo kyawama bingi. Twamusachila Nkambo pa kyokyo, amba aye Nkambo wa butemwe, wayula na lusa. Anweba twajijilaitu nakuketekela byo mwabujilwe muno, monai, ukekalatu bulongo.

Bino, anweba mubena kumvwa bulongo lufunjisho nyi? Mwatemwa lufunjisho nyi? [Kipwilo kyaamba mba, “Amena.”—Waku.] Oo, Na—Na—Nalangukuka mba lwitubila byawama. Lwitupako kukokoloka pacheche ku kulombelela bakolwa, ne bimwesho, ne lubuko lwa Bulesa. Mambo, pano, bufuku buno atweba. . . Pa kupwisha kupwila, tusa kulombelela bakolwa ne jikwabo, bufuku buno. Kimye kyonse tukeba kuuba kyokyo, kubatizha uji yense pa kimye kiji kyonse.

Baanga bavuluka kimye kyo Naendanga mu milaini ya malaiti? Kyawama, Amiwa naendanga monka mu malaini amalaiti, bimye byavula, naendanga sate mailoshi pa juba nakupita mungye. Najinga na tuu aduleendi eite mailoshi nakwenda mu mulaini. Naendanga kupita momwa, jilaya mu maboko mi, kabiji, oo, naikalanga wakoka bingi, na kwenda momwa mu jisaka, kabiji sokotela kasa achibang’ana. Na kumanya umo mukote ne kwikala mushi ya kichi kabiji ne kwisamba naji pa bya kubatizhiwa mu Jizhina ja Nkambo Yesu. Aye waamba mba, “Kyawama, Amiwa kimye kyonse nkeba kubatizhiwa.”

Naamba mba, “Kechi palepa kuya ku kakola ne.” Kabiji aye waamba mba . . .

Kabiji Nasendele bavula ba mwiabo momwa ne kwibatizha mu Jizhina ja Yesu. Kuyatu monka mu mulaini, nangovu yonse yo Nkonsha kwenda nayo. Abyo ibyo. Bimye byavula na byakuvwala byami byakala byakito, wabatizhapo umo, waikila kufuma ku kichi kya malaichi. Waikala byobya na kwingila ku kichi kya malaichi; Amiwa najinga wakwingijila mu mulaini, ne apo, kwingila kasa wakilang’anya pa kichi kya malaichi, na muntu, nakwamba nanji bya Nkambo. Aye wakonsha kwamba mba, “Kika, Billy, juba jimo Amiwa keya ku kipwilo kyobe na ku batizhiwa.”

² Amiwa naamba mba, “Kika kyakupembelela poso kyokya kimye? Atweba tuji konka ku mukola, kuji meema avula bingi.” Bakwatai ponka pano. Abyo ibyo. Akya kyo kimye. Filipa waambile mba . . .

³ Aye tungu waambile kwi Filipa, “Meema awo, kika kisankukanya?” Abyo ibyo. Kafwako. Inge winengezha, akye kyo kimye. Kechi muleke diabola atwezhepo kintu kimo pakachi ne. Kechi mutwale mu keesha bintu byo mwakonsha kuuba leelo ne. Ja keesha kape kechi jikamweka ne. Navuluka kimye kimo Naubile kyokyo, nafunjile, kyafunjishe lufunjisho. Nabujile kuuba kintu kimo kyo Nafwaijilwe kuuba juba jimo, kabiji jalondejilepo kechi kwajinga kimye ne.

⁴ Bino, kine Amiwa kechi nasaka kwimulama kyonse kye kimye ne. Bino Amiwa ngikala wa—wakatazhiwa bingi, kabiji, Amiwa kechi nayuka ne, Amiwa neumvwa bingi bulongo poso nelubako Amiwa mwine, pepitu. Ngumvwatu bulongo.

⁵ Pano twayai tukunyike mitwe yetu pakakimye kacheche kasa tukyanye kufwenya kwipi ku Kyambo.

⁶ Taata Wetu Wamwiulu, Anweba yenu Lesa mumi, uji na bumi myaka. Juba jazhika, aja juba jitutu jimo, Danyela wi jimwene byo jazhikilenga, Yelemiya wi jimwene byo jazhikilenga, Adama wi jimwene byo jazhikilenga, Yesu wi jimwene byo jazhikilenga. Kabiji ke ntanda imotu yo baikemo ne kwendamo, kabiji Anweba mukijitu Lesa umo yeka.

⁷ Bufuku buno kuji bya kukabila byavula. Muntu uji na kitumbwa tumbwa pa bongo, nyenga uji na moyo na kintu kimo. Anweba yenu luketekelo lonkatu, Nkambo, kuji kya byobyoye. Kitumbwa kyaaluka ke kilonda, kafwako nangwa kimo kyakonsha kwikilekesha ne. Kyafika pakuuba mba maboko a kwa dokotala kechi akonsha kupana bukwasho ne. Bino bufuku buno tuji na malekenyi etu aacheche, a kulondela awa mwanamukoko, pa ku mubwezha mu kipaka kya Bashanji. Mu Jizhina jakwa Nkambo Yesu milombelo yetu twitazha mu kwipaya bokwe, kitumbwa, ne kilonda, pakuuba mba twibaleta mu kipaka mu mutende.

⁸ Kabiji atweba, Lesa, twavuluka bufuku buno Ndamakyaalo wetu watemwikwa, mulongo, wetu Dwight Eisenhower. Aye watangijila ntanda, Nkambo, waeseka kwitulama kwakubula nkondo. Aye walaile mba nkondo ya ku Korea yafwainwa kupwa inge waikala na jishinda ja kwiipwishishamo. Aye walaile aba bamaama mba ukabwezha aba bansongwalume. Bino aye waambile mba, “Amiwa kwikyuba, kechi Nakonsha kwikyuba ne. Nakonsha kubikamo bulume bwami, bino Lesa yekatu wakonsha kwikyuba.” Kabiji Anweba mwajinga nanji, Nkambo, kabiji pano byonse byapwa. Kika kyo bakonsha kubula kumwena kyokyo patanshitu? Lesa, Nalomba mba Anweba musakumukwasha. Peshai awa mweo wabukilobo, Nkambo. Kabiji twalomba mba Anweba muketusajiila ntangi wakulondelapo. Kyatongwelwa jimo kikobiwa, Nkambo.

⁹ Bino Umo ye twasakisha bufuku buno, kufumyako bya mukyaalo kyetu, ke Yewa mukatampe ubena kwiya na kwikajika

Bufumu abo bukabula mpelo, aye Nkambo Yesu, Mwaana Wenu. Apo ipo po bakekumbata maboko abo, mangengele akajila kabiji kechi kukekala nkondo jibiji ne. Bakajima majimi a bipangwa kabiji bakaja bipangwa byao. Abo bakanshimika manzubu, ne kwikalamo. Kabiji kechi kukekalako makatazho kufuma mu kyokya kimye ne.

¹⁰ Tupeshai pano byo tubena kufwenya ku Kyambo. Kabiji, Taata, Anweba mwayuka eene mambo o Mbena kufwenya ku Kyambo kutatwila ku kikye Kinembelo. Ke mambo akuuba mba Na—Naumvwa mba Anweba mubena kukeba mba ne kyubile muyuwe musango, kyakuuba mba kyo kyaswa Bulesa Wenu, kiji mu ndonda Yenu, kiji mu . . . kiji mwayila ndonda ya jino juba, kuleka bantu batane bifulo byabo kabiji bekale benengezha mu kimye kya nkondo. Nobe mulongo wetu byo a jikwamba mu milombelo yanji kwi Anweba kimye kicheche kyapitapo, “Oo, Anweba mwitufunjisha kimye kyabaya, Nkambo.” Pano, Taata, ntupai bifulo byetu. Ntubikai monka mo twafwainwa kuubila, pakuuba mba twikale bakwingila mwingilo wa ba Taata. Mambo twikipuzha mu Jizhina ja Yesu, Mwaana Wenu. Amena.

¹¹ Najinga na kimye kyawama mabaanga ano, pakwisamba na dokotala waya bingi kuwa mu Louisville, manase wanji. Baumwine pa bintu byawama bya kwa Nkambo. Kabiji bashanji bajinga ba dokotala. Kabiji waishile nkoji ne kwikala waikajile mu lumu wami kimye kyabaya kya mabaanga, po atweleletu, wafikile mukachi. Ke muntu wawama bingi; nangwa mba ke muntu wakosakanako pacheche, mwayukatu, musango wakukosakana, kyakutatwilapotu ke mwine waki Presbyterian, bino washajiletu na mipolo ibena kupopoloka pa mabuta anji. Oo, Ami . . . Lesa uji nabyo byalamata kosekonse, mu maofweshi aba dokotala, mu bamanase. Amiwa kechi naketekela mba muji manase mu Kipatela kya Norton Infirmary ye Nabujile kushimwina pa lwa kwikala na Mupashi Wazhila ne, kabiji ne kumwipuzha kana wabatizhiwa mu Jizhina ja Yesu. Kechi kujipo dokotala ye Nakumanyapo kala, kuji konse, nangwa kafwa- . . . Mwamona?

¹² Babulai pa Kikye. Atweba kechi tuji na kimye kyabaya ne, mulongo. Nangwa kikale kyakosa byepi kuno, mpembelaitu byo mukapita pa pemeno yapelako po mukamona, nanchi po mukalanguka mba inge mwikyubile. Ee, mwane. Kechi mupembelele kana kyokya kimye ne, twayai twikyube ponkapano. Uno ye awala. Oo, bafwainwa kukana, ne kuzhingila kabiji ne kwikyubila bisela, bino kechi bayuka byo kyalumbulula ne. Abo kine kechi bayuka byo kyalumbulula ne. Abo—abo—abo bajitu bulongo. Bemuletela bisela anweba, bino—bino vulukaitu, abo—abo kechi bayuka byo kyalumbulula ne. Kechi bayuka byo kyalumbulula ne. Abo kape bafunjishiwapo kintu kimo kabiji abo batwajijilatu na kyonkakyu, nanchi

anweba—anweba mwakonsha kumona milanguluko yabo. Anweba kechi mwakonsha kuseka nabo ne, anweba kusekapo nangwa na umo ne, pakuuba batemwaitu mu Kikye. Kabiji ne kwibalombelela.

¹³ Kyawama, Nalanguluka mba twafikile ku veeleshi wabu 9, Amiwa kechi naketekela bulongo ne. Ako ke kwalepesha kufuma ku kyapitala kyabu 3, kechi ibyo nenyi, bantu? Bino oo, Ke buki buji mu jibwe, kwi amiwa! Pano twaambilenga, vulukai, pakuuba mba tubweleko panyuma jibiji. Kabiji pano, Mulongo Neville, obewa—obewa usakundosako pacheche inge Nakakalwa kumona kupwa kya kimye, pakuuba mba Naikalako na milombelo ya bakolwa. Tubena kukeba kutola konse ka kintu kacheche kotwafwainwa. Kabiji bufuku buno Nakeba kwita lwito lwa kukitapisho. Amiwa . . . Pakupezhako na kikye Nafwainwa kutanga kyonsetu.

¹⁴ Bino eene mambo a kikye, ke, kumona kifulo kyobe mwi Kilishitu, byo namona mba kechi ke kintu kyo wafwainwa kutwelamotu ne, nangwa kintu kimo kyafwainwa kwikala . . . obewa wafikijilemo kuntu kumo, bino kana kyokya Lesa kyo akubijile, Aye mwine. Kechi mambo a kuuba mba wajinga wawama bingi waya ne ku kipwilo bufuku bumo ne, amba mulongo umo kamulanda wakutangijile kuya ku kitapisho ne. Kabiji kechi kyajinga kyokyo ne. Kyajinga Lesa, kintendekesho kya inontanda kasa ikyangye kwaalwa, watongwejlwe jimo ku Bumi Bwapeenape. Kabiji inge wafikako mu aja juba, kechi kyakuzhinauka ne aba foote . . . bakulumpe tweti-foolo bavujile michinya yabo, muntu yense watujile mu muchinya wanji, bonsetu baponene kikuvumene, abo kechi bajinga na kintu kimo kyo bakonsha kwamba ne, kafwako musapwishi ne, kafwako mukulumpe ne, kafwako nangwa kimo ne. Lutakaiko lonse lwikale ku Mwanamukoko! Lesa ukabungizha bintu byonse mwi Aye pajoja juba. Oo, inge twakonsha kuyuka kabiji ne kutuluka Awa wajinga ng'anyi Ye bapopele pa musalabu. Pano pa . . .

¹⁵ Tutatwile pa veeleshi wabu 8, pakuuba mba tubweleko panyuma.

Bo etuvuzhizhe atweba na maana onse ne na kutekanya konse;

Byo etusolwejile akya kyafyamika kya ku muchima wanji, . . .

¹⁶ “Abya byafyamika bya ku muchima Wanji.” Kabiji vulukai byo twaimene pakyokyo? Baanga bajinga muno lukeelo luno, twayai tumone. Byo twajikwimana pakyokyo, “kyafyamika kya ku muchima Wanji.” Bino, kechi ke kintutu kicheche ne, nanchi ke kyafyamika. Lesa kyaswa muchima wanji ke kyafyamika. Kabiji muntu yense wafwainwa kukeba kyaswa muchima wa Lesa pe aye mwine nangwa wamukazhi, kyafyamika kya Lesa.

17 Twakonsha kwikitana byepi? Paulo, kyayukanyikilwe kwi aye. Aye waambile mba kechi wakepwezhepo ku muntu, wa mubiji wa nyama ne mashi ne. Aye kechi wailepo ku sukuulu ne, kafwako sukuulu wa mamboawama ne. Aye kechi wajingapo na kimo kya kwingila nakyō ne. Bino aye. . . Kyamusolwejilwe kwi Yesu Kilishitu, Awa wa musambakene pa lwendo lwa kuya ku Damasakasa, mu—mu Kyeya kiji nobe Mumbulungwa wa Mujilo, kabiji Kyamwichile. Kabiji waile ku Arabia, kabiji waikele konka myaka isatu. Oo, kechi mwalanguluka mba kyajinga kimye kyabaya nenyi, Mulongo Egan? Pa myaka isatu Paulo wajinga kokwa ku Arabia, wamumwenejile ka nzubo kacheche kuntu kumo, kasa endauka kuku ne kuku mu nzubo, na mivungilo yakala. Kechi bajinga na ya katataka ne; Paulo ye wi inembele, yavula. Monka mu yoya mivungilo yakala, pano Lesa, pa ntendekelo, witutongwejile jimo ku Bumi Bwapeenape. Kabiji ne byo Akatuma Yesu, amba kupichila mu kkiye Kitapisho twafwainwa kwikala na lusa ku Kichi kya Bumi. “Aba bo Ayukijile jimo, ibo bo Aita; abo bo Aita, ibo bo Abingisha kala; abo bo Abingisha, ibo bo Atumbijika.” Lesa, kufumatu ne kuntendekelo ya panopantanda, witutongwejile jimo amba kebalule ke baana. Pano bilengwa byonse bibena kubiza, kupembelela kusololwa kwa baana bakwa Lesa. Oo, Nakonsha kulanguluka mba Paulo wajinga na kimye kyawama bingi. Nakonsha kutemwa kwikala nanji kokwa. Kuuba mwatemwa nenyi?

18 Bino aye waambile mba, “Aye witusolwejile atweba kyafyamika.” Lekai Mupashi Wazhila eye pe obewa kimye kimo, kabiji watatula kupitulukamo mu Kyokyo kabiji mwakonsha kumona byo Kyubiwa. Uno mute Najinga na, oo, pepi nobe mamineti sate akufunda, na kupitulukamo mu lufunjisho; kapepo kechi ibyo ne, Nakonsha kwamba pakachi ka kyokyo, mamineti fiftiini mukachi ka bimye. Kabiji Natatwile kupitulukamo, kabiji Nalangulukile mba, “Kyafyamika, kyafyamika byepi !” Kabiji Kinembelo kyatwajile mu Lulayang’ano Lwakala, ne kubwela mu Lulayang’ano Lupyā; ne kwikikasa pamo, monai kyafyamika kya Kwiya Kwanji, kyafyamika kya ku muchima Wanji, kyafyamika kyetu kya kwikala pamo. Vulukai, kechi kyafwainwa kufunjishiwa mu sukuulu ne. Ke kyafyamika. Anweba kechi mwakonsha kwikiyuka kupichila mu kufunda ne, kupichila mu masukuulu a mamboawama ne. Ke kyafyamika kyafyamikile kufumatu kuntendekelo ya panopantanda, kupembelela kusololwa kwa baana ba Lesa.

19 Mbulai, mulongo wami, mbulai, nyenga yami, kyajinga kimye ka baana ba kwa Lesa po bakasololwa akyo kyapusana na kino? Ng’anyi kimye mujishimikila, kyafwainwa kusololwa kupokololwa kwa bilengwa na lesa? Bilengwa, bilengwa abyo bine bibena kubiza, kupembelela kimye kya kusololwa. Kika,

mfuto ya mambo kasa ikyangye kupanwa ne, Mupashi Wazhila kasa akyangye kupanwa ne, byonse bye kasa bikyangye—byonse bya Mulayang’ano Lwakala, monse mwa, kechi kwafwainwajilwe kwikala kusololwa ne. Kyapembejilenga poso kino kimye. Pano bintu byonse byaletwa, byaiya, na kufika ku jibwe ja jikoka, na kusololwa kwa baana bakwa Lesa kubwela jibiji, kabiji ne Mupashi wa Lesa kwiya mu babo bantu, bulongotu, poso ng’ingijilo yabo yaikala bingi pepi na ya Kilishitu poso yanungakana Nanji kabiji ne Kipwilo Kyanji pamo.

²⁰ Baanga bafunda jishimikila ja pilamenda? Naketekela kape inetu umo papo wajikusutula kuboko kwanji. Kijitu bulongo.

²¹ Lesa wanembele ma Baibolo asatu. Umo wajinga Zodiac monka mwiulu, awa ye Baibolo mutanshi. Muntu wajinga wa kutala mwiulu pa kuuba avuluke mba Lesa wafuma mwiulu. Londelai Zodiac, bushe mwafundapo nyi? Yapana ku kila nkulo, ne ku nkulo ya kaasa. Yapana ntendekelo, kitans-... kusemwa kwa Kilishitu. Kintu kitanshi mu Zodiac kyajinga kika? Kisungu. Kintu kyapelako kika? Leo awa Bokwe. Akwa Kwiya kutanshi ne Kwiya kwa bubiji kwa Kilishitu, byonse byanembwa monkamwa.

²² Pano walondejilepo Baibolo wanembelwe, wajinga mu jibwe, watelwa mba “pilamenda.” Lesa wanembele mu pilamenda. Inge mwi bifunda, monai mashimikila akala ne mankondo, byo byashimikilwe konaunwa kwa muyulo kasa kukyanygye kwikalako ne.

²³ Wabusatu wanembelwe pa kipepala, ye Baibolo, wa ikatampe, ntanda yafunda ya maana ya kwiya palutwe. Bino, byonka Lesa byo aenda kupita mu nkulo, atweba tuji pe Leo aye bokwe. Atweba tuji pa kubikwa kwa kitungutungu kya pilamenda. Atweba tuji mu Buuku wa Lumwekesho, mu kyapitala kya kumpelo. Sayaasi waamba mba kwashala mamineti asatu kufika pakachi ka bufuku. Oo, langulukai peepi potuji.

²⁴ Kabiji monai, twayai tutole pilamenda, kyapelatu. Yenda nobe iji na mankoka asatu.

²⁵ Kimye kyo twajinga ku ntendekelo ya nkulo ya kipwilo, panyuma ya Lifomesheni mu kimye kya kwa Luther, muntu kwambatu mba Mwinakilishitu, kyatongwelenga bumi bwanji nangwa lufu. Bamwipaya ponka pa kwambatu mba Mwinakilishitu. Onkao mambo pa kupita mu kumanyikwa... Kila nkulo, kimye kyonse, kwajinga bya kumanyikwa. “Bonse bekala bumi bwa bulesa mwi Kilishitu Yesu bakamanyikwa.” Mu nkulo yakwa Luther, kyajinga kyamalwa pakuuba mba wambe mba “Mwinaluther.” Bakumona nobe wa myendeleko, kabiji bafwainwa ne kukwipaya. Bimye byavula bebpailenga, kwibasoka, kabiji ne bintu byonse, mambo Abenaluther.

26 Kipwilo kyailenga na kukepelwa, nobe pilamenda. Kyaishile mutampulo ikwabo ya lusa, ayo ko kutokeshiwa. Wesley kimye kyanji, byo akaine kipwilo kya Anglican, ne kufunjisha kutokeshiwa. Kyaishile mu bacheche jibiji, kabiji batelelwe amba ke jibumba ja kisangajimbwe.

27 Baanga muno bajinga ba Methodist, nangwa mba byo bajinga, nangwa kimye kimo banungakene na kipwilo kya Methodist? Jibumba pakachi. Bushe mwayuka mba kipwilo kya Methodist kimye kimo kyajinga peepi na kwikala na Mupashi Wazhila? Naya ku bipwilo bya Methodist kabiji ne bamona byobapona panshi, ne kwisupila meema mu kilungi ne kupupushila mwela, kukanya Mupashi Wazhila kwiya pe abo. Abyo ibyo. Bino, abo bo bukine, akwa ku tutumbatumba twa ku Kentucky twajinga na ba Methodist. Anweba mwi bantu benungako kuno. Twajinga na ba Methodist kunyuma kokwa, ne ba Baptist. Twaila kulutwe ku kitapisho kabiji ne kwipuma panyuma abo bene poso twatambula kintu kimo. Twapichilemo, panyuma ya kyokyo twaikele bwikalo bwapusanako.

28 Pakuuba anweba mwiya mu mwanemba jizhina jenu mu buuku ne kwamba mba, “Amiwa ne Methodist.” Kabiji ne kutola mwakulungila mukele ne kusansang’ana meema acheche pe obewa, kabiji byo byonka. Mwalupuka kasa mwawala tuputula, byakwipeta peta, ne kwikyombesha na bambili, kubekya, ngyuka, kukaya mashinyi a bya mali ne bintutu bikwabo, bakijitu bawama ba Methodist, monai. Abo kechi ba Methodist ne. Aba ke benungakotu ku kipwilo. Abyo ibyo. Baptist, jishindatu jimo, Presbyterian, kuyatu kulutwe mujishinda jimo.

29 Nobe byaambile David duPlessis, “Bankana, Lesa kechi ujipo na bankana ne.” Lesa kechi wajinga na munkana ne. Aye uji na baana babalume, bino kechi bankana babalume ne. Abyo ibyo. Anweba . . . kabiji bantu beya mu kipwilo kya Methodist, nangwa kipwilo kya Pentekosito, nangwa kipwilo kya Baptist, nambo bainobe nangwa bashobe bajinga ba Pentekosito nangwa Baptist, nanchi obewa wi munkana. Abo bajinga baana. Obewa wi munkana, monai. Nanchi Lesa kechi ujipo na kintu kya yewo musango ne. Kipwilo kiji na byavula bya byo byo, bino kechi—bino kechi aye—kechi aye—kechi . . . Lesa kechi uba ne.

30 Pano, monai bibye, kiyatu kulutwe poso kyafika panshi, byo kiya kufika kubucheche, kipwilo. Aya nkulo yaki Pentekosito yatatwile. Aky kine kyachibileko bitutuju byavula. Pano kyaubile byepi? Kyashile panyuma ba Methodist ne ba Lutheran bonsetu.

31 Bino aye Mupashi Wazhila waenda kufuma mu nkulo ya ba Pentekosito. Baubile byepi? Abo balengelemo kabungwe, ne kwilenga abo bene, “Atweba twi ba Assemblies of God.” “Atweba twi ba Oneness.” “Atweba twi Bu bubiji.” “Atweba twi Kipwilo kya Lesa.” “Atweba twi *kiky*e, nangwa *kyonkya*.”

Obewa kechi walamata kuntu kumo ne, obewa kuuba waya Mwiulu ne kanatu jizhina jobe jiji mu buuku wetu.” Oo, aamo kechi muji maana ne! Amiwa kechi nasakamana ne inge wi Baptist, Methodist, Presbyterian, ubika jizhina jobe mu Buuku wa Bumi inge Lesa wijibika momwa. Inge obewa watongwelwa kuya ku Bumi bwa Peenape, Lesa ukakwichila mu jishinda jimo, nangwa byonkabyo, jimo—mujishinda jimo nangwa jikwabo. Aye kine ukeyyuba. “Bonse bo Bampa kwi Bataata bakeya kwi Amiwa.” Kechi mambo ne nangwa wikale wa ku ng’anyi kipwilo, akyo kechi kijipo na mwingilo ne. Pakuuba dinominesheni kechi ikobapo kintu kimo kwi obewa ne, bino kyakonsha kukulengela obewa kubula kwendela pamo na Lesa, bino kechi kikooba—kechi kikoobapo kintu kikwabo ne. Kupwila pamo na jibumba ja baitabila ne babula kwitabila. Onkao mambo, mwakonsha kwikitana konse komwakonsha kuya, kabiji bajinga ne na kyokyo Mwiulu. Nanchi, kijitu bulongo, bino obewa ubena kutala ku dinominesheni obe. Talai kwi Yesu, Aye Iye wakutalako.

³² Pano byo tubena kuya kulutwe . . . bajinga na . . . Baanga . . . Naketekela mba awe mwanamukazhi papo wajikusutula kuboko kwanji, amba wafunda pa pilamenda. Mwayukatu, pilamenda kechi yabikwapo kitungitungu ne, ibyo nyi? Kechi yajinga na jibwe ja jikoka ne. Abo kechi baubile ne, kechi bekitaine ne. Abo kechi bayuka ne kyamwekele kukikye ne. Kika? Kika jibwe ja jikoka kyo jabujiilwe kubikwa peulu, mutwe wajikooka, peulu yakyo? Mambo Aye bamukaine byo Aishile. Aye wajinga Jibwe jasulwa. Abyo ibyo. Bino pa kabikwa kitungitungu pa mutenge. Abyo ibyo. Kabiji aa mabwe anungakana bulongo na Mutwe wajikooka, akekala mabwe apashang’anya bulongo na joja Jibwe, akasokakana najo, pa manungi kabiji ponse—ponse ponse. Pilamenda yaikala yalumbuluka bingi kyakuuba mba kechi wakonsha kupisha kalezala pakachi ne, inge aa mabwe aikala pamo. Ke busendwe bwa mabwe bwawama bingi. Bimo byakonsha kwikala na kinemenezhi kya matani ma aduleendi kuya mwiulu, kabiji kyaimikwa pamo bulongo.

³³ Ajo jo jishinda Lesa jo abena kuletelamo Kipwilo Kyanji. Atweba twaikala bakwatakana pamo, muchima umo kabiji ne kuyila mumo. Bino muntu umo wamba mba, “Kyawama, Benaluther kokwa kunyuma kafwako kyo bajinga nakyo ne.” Anweba kechi mwikiketeekele ne. Bena Luther bakeya mulusanguko nobe bakwabo bonse bashala byo bakasanguka mulusanguko. Baptist, ba Presbyterian, kabiji ne bonse baana bakwa Lesa, bakeya mu lusanguko. Kabiji ao oene mambo bantu leelo kyobambila mba, “Oo, kyawama, kukekala kusangululwa kwa ntanda yonse ne kupulusha aduleendi milyoni ya ba Pentekosito. Bonse bakapuluka kabiji kukekala Lapicha.” Obewa uji na kilubo. Awa Lapicha ukekala ma aduleendi a masauzande, abyo ibyo, bino bakamwekanyika mu myaka sikisi

sauzande ya lupulukilo ne apo, kubwela kunyuma myaka sikisi sauzande. Muntu wenda mu Kyeya monka mwishila Kyeya kwi aye, aye wabuka byabu pakwiya kwi abo. Pano, inge Wikikana, nishi washala mu mfishi. Bino inge watwajijila na kuya kulutwe!

³⁴ Pano, monai, nanchi Kwiya kwa Nkambo Yesu kuji bingi pepi poso Mupashi kufuma mwine mukachi mumwe... kujitu lubingisho, kutokeshiwa, lubatizhilo lwa Mupashi Wazhila, kabiji pano tuji mu kimye kya kwiya kwa Mutwe wajikooka. Akyo Kipwilo kyafwainwa kwikala kyalumbuluka byonka biji Kilishitu poso Kilishitu ne Kipwilo ba kwatakana pamo, Mupashi umotu. Kabiji inge Mupashi wakwa Kilishitu uji mwi obewa, Ukulengela obewa kwikala bumi bwa Kilishitu, byubilo bya bumi bwa Kilishitu, kuuba mingilo ya Kilishitu. "Aye wangitabila Amiwa, mingilo Yonguba ne aye ukeyuba." Yesu ye waambile byobyo. Mwamona? Pano tukekala, tuji na ng'ingijilo ibena kwiya ayo ijitu pamo na bumi bwa Kilishitu. Aya ng'ingijilo imweshi ka? Akwa Kwiya kwa Nkambo.

³⁵ Kimwenai muntanda leelo, kabiji talai bibena kwamba Khrushchev, abye bintu byonse bikatampe, kabiji kuji malwang'ano a ntanda-yonse abena kufwenya pepi, pa kimye kiji kyonse, kyakonsha kwalukatu ke bunga pa sekondi uji yense. Abyo ibyo. Kabiji inge kya kuuba mba, twayuka mba akyo kijitu pepi. Yense muntu walumbuluka wakonsha kutanga mu mapepala abyambo nangwa kuteleka ku wailishi, kabiji wayuka mba akyo kijitu pepi. Kyawama, vulukai, Kilishitu ukalonda Kipwilo Kyanji akyo kasa kikyanye kubiwa ne. Nanchi Kwiya kwa Nkambo Yesu kwafwenya byepi pepi? Kapepo kuno kupwila bufuku bunu kasa kukyanye kupwa ne. Tuji mukimye kya kumpelo. Kyakine.

³⁶ Talai kipwilo byo kibena kwiya, byo kyenda. Kisendaitu mu milanguluko yenu, anweba bapinto bafunda bintu byapita kala. Monai kipwilo kya bena Luther kyajinga mu lubingisho, po kyafuminetu mu Bukatolika, kimonai byokyaendele. Kabiji mutale kwi Wesley byo aishilenga na kufwenya pepi, mu kutokeshiwa, nakupita mu Binembelo. Talai monka mukachi kabo, bena Wesley. Nanchi kintu kikwabo kyalondejilepo kwiya ke nkulo ya Pentekosito. Kabiji nkulo ya ki Pentekosito na kubwezihiwa kwa bya bupe, bya bupe bya bumupashi. Pano, talai pa nkulo ibena kwiyapo pa kino kimye ke Mutwe wajikooka. Mwamona Moombena kutazha nyi? Akwa Kwiya kwa Nkambo, kwayukanyikwa. Lesa pamotu ne bilengwa byonse babena kupembelela kipwilo kutana kifulo kyakyo.

³⁷ Lukatazho leelo, Na...pepi nobe muntu yense Yenakumenye. Amiwa naambijilwe, twatambwilenga... Nafwainwa kupimwa mubiji yense, mwayukatu, inge tubena kuya mu byaalo bya bushiya bwatulunga, anweba bamishonyi ne bakwabotu mwayuka kyokyo. Kimye kyo Bapiminenga

batwajile mu kibamba kokwa, Natomenenga abya byakala... byamwekelenga nobe makoko, nangwa bunga, nangwa kintu kimo, kabiji Amiwa—Amiwa ne bitoma kimye kyonse. Kabiji nalupukilemo, naikala panshi, na kupembelelako afu awala umo pakuuba mba tumone kana nakonsha kulasa nangwa ne. Nakeketele kukilang'anya byobya, kabiji kwajinga mwanamukazhi umo wakepa kamubiji, wamwekele nobe uji pepi kufwa. Mwanamukazhi wajinga bingi... tumikupa tuheche ne tuminkoko tuheche. Kabiji Natwajijiletu na kwenda kufuma pa yuwe muntu ne kuya pa mukwabo, awe muntu ne pa mukwabo muntu, na kufwenya kwipi ne aye, poso byo Nafikile ponka poajinga. Aye wamwekelenga nobe awa kamulanda muheche wajingatu pepi kufwa. Kabiji Naimene pepi ne aye, Naambile mba, “Ndekelaiko mambo, maama.”

Waambile mba, “Uji byepi?” Oo, wajinga wakolwa bingi!

Kabiji Naambile mba, “Kika kyatama?”

³⁸ Aye waambile mba, “Naile ku Tucson na kupepula mwanami wamukazhi. Nakolelwe, bakakelwe kutana kyatamako.”

³⁹ Naambile mba, “Kintu kimo kyo Mbena kukeba kukwipuzha.” Naambile mba, “Amiwa ne musapwishi wa Mamboawama. Obe wi Mwinakilishitu nyi? Winengezha kuya inge akya kimye kyafika nyi?”

Kabiji waambile mba, “Amiwa nalamata ku kipwilo kya *kananga-ne-kananga*.”

⁴⁰ Naambile mba, “Ajo kechi jo jipuzho jo Naipuzha ne. Obe wi Mwinakilishitu wayulwamo na Mupashi wakwa Lesa kabiji winengezha kuya inge Aye wakwita nyi?” Awa mwanamukazhi kechi wayukile ne kyo Naambilengapo ne. Mwamona? Oo, ke kintu kyabulanda bingi ntanda yo kijimo!

⁴¹ Pano, “tuyukishai byafyamika bya ku muchima Wanji,” kwiya... Lekai ne mutangilepo kintu kimo. Natangilenga monka... Twayai pano tuzhikule ku “kyafyamika kya ku muchima Wanji.” Twayai tuzhikule mu Bahebelu papo pa mineti umo, kyapitala kyabu 7 kya Bahebelu, Naketekela byo kiji. Kabiji Nakeba kwimutangilapo kintu kimo akyo kyakonsha kwimulengela kumvwa bulongo inge twalanguluka mba atweba twaikala pamo mu mampuzha a Mwiulu. Bahebelu, kyapitala kyabu 7.

Mambo aye Milekezendeke, (Pano monai.) mfumu wa Salema, ng'anga wa mwine wakila Lesa, . . .

⁴² Kyafyamika kyokika pano? Kino kyo kyafyamika, talai kikye. Ing'anyi we Mulongo, “ubena kuuba, wayuka, kyafyamika kya ku muchima Wanji,” awe Milekezendeke? Amiwa mbena kupembelela muntu yense muno, ma Baibolo abena kukizhikulwatu. Bahebelu, kyapitala kyabu 7, Paulo ubena kwamba, muntu umo mwina Ngalatiya.

Mambo awe Melekezendeke, mfumu wa Salema, ng'anga wa mwine wakila Lesa, . . . wamusambakene Abulahama byo afumine na kutapa bamfumu, kabiji wa mupesheshe;

Ko kwi aye Abulahama ko apaine kibese, kibese kyabu jikumi kya pa byonse; kitanshi pa kulumbulula, mwaila kulumbulula ke Mfumu wa bololoke, . . . panyuma ya kyokyo. . . Mfumu wa Salema, (Awe ye ng'anyi Mulongo?) ao ye, Mfumu wa mutende;

Wabula shanji, wabula inanji, wabula kisemi, kechi uji na ntendekelo ya moba ne, nangwa mpelo ya bumi ne; . . .

43 Awe Muntu wajinga ng'anyi? Wajinga Ye ng'anyi? Aye kechi wajinga na bashanji ne, Aye kechi wajinga na bainanji ne, Aye kechi wajinga na kimye Kyakuntendeka ne, nangwa Aye kechi wajinga na kimye kya kufwa ne. Aye wasambakene Abulahama byo afuminenga na kutapa ba ma mfumu. Kika kyo aubilenga? Aye waile na kusenda Lota, mulongo wanji walubilamo, na kumubwezha. Kabiji aye watapile ba ma mfumu; akyo, aba ba ma mfumu batapilwe; Naketekela bajinga jikumi nangwa ba ma mfumu fifitiini, kabiji ne bufumu bwabo. Bino Abulahama wapaine bilwilo ku bakalume banji kabiji wa mulondejile, wiabenye aye mwine mu bufuku, monai, byo amukwachile mu kimye kya bufuku. Oo, mulongo, tubena kwingijila mu mfishi, Kyeya kyo tunji nakyo ke Kyeya kya Mamboawama. Pakuuba wi abenye aye mwine, wamutaine ne kumubwezha. Kabiji wajinga mu mukwakwa na kubwela, panyuma ya kupwisha nkondo!

44 Twayai tuye ku Ntendekelo 14, pakaminetitu kamo, tumone bulongo jishimikila. Twayai tuye pano mu Ntendekelo, pa foo- . . . Naketekela ke kyabu 14, Ntendekelo 14. Ee, twayai tutole Ntendekelo 14:18, kutatula. Twayai tutatwile panyuma pacheche. Twayai tutatule, ee, veeleshi wabu 18, Ntendekelo 14:18, "Kabiji Milekizedeke. . ." Pano, awa ke Abulahama ubena kubwela kufuma na kutapa ba ma mfumu. Wabwelelenga, mu mukwakwa, na ku mubwezha Lota, ne bantu bonse bo basendele. Bonse!

45 Nobe Davida, waile na . . . Kika Davida kyo aubile? Watolele malekenyi acheche, waile na kwangata mwanamukoko wa mucheche kufuma mu kanwa ka bokwe. Langulukai malekenyi, na kulondela mwanamukoko. Ng'anyi mu ntanda wakonsha kuuba kyokyo? Mbulai ng'anyi muntu muno wakonsha kwikyuba, sutulaiko maboko enu. Amiwa nsakwimubuula bukijitu mba mwaya mungi. Kechi mwamonapo amiwa kusutula kuboko kwami ne. Ine, Amiwa kechi nakonsha kumwendela na sate-oo-sikisi ne, nangwa pachechetu ne. Bino aye waileko na malekenyi, kamupila kachechetu, na tambo ibiji, ya mpombwako. Mambo . . . Kabiji byo kyafikile kimye kyakwa

Goliata kya kwitota, aye wamulondejile Goliata, kabiji aye waambile mba, “Aye Lesa wa Mwiulu wa ndengejile napokolola mwanamukoko kufuma mukanwa ka bokwe, kufuma mukanwa ka mbeyala.” Aye wayukile mba kechi malekenyi ne. Bwajinga bulume bwakwa Lesa bwailenga nanji. Aye Iye wabwezhezhe awa mwanamukoko.

⁴⁶ Kabiji abyoy byo tubena kwaamba leelo. Lesa uji na ba Davida bazhokoloka, ee mwane, abo abena kujisha mikoko ya Bataata. Kabiji kimye kimo kitumbwatumbwa kikeya, nangwa kaasa ukeya, nangwa kintu kimo, kabiji watoloka kufuma mu maboko akwa dokotala. Akyo kechi kyakonsha kukanya Davida ne, aye ukatwajijilatu na kulondela yewa mulongo, na malekenyi acheche, akuba mba, “Lombai kyonse kyo musaka mu Jizhina Jami, kikemupewa.” Amiwa kechi natako muchima ne, bandokotala bakonsha kuseka, kabiji ne muntu yense wakonsha kumuletela bisela, aye ukamulondela nangwa byonkabyo, na kubwezha yewa mukoko mukipaka. Ee, mwane. “Aye ke mwaana wakwa Lesa, mfumyapo kuboko kobe pe aye!” Waimbile bokwe wapon, kabiji bokwe wabukilepo, wamuvembele ku myevu ne kumwipaya wamwipaya; nsongwalume muheche wabula kumweka bulongo, uji na kinemenezhi kya eite nangwa mapauindi naite.

⁴⁷ Monai. Milekezendeke, Mfumu wa Salema kokubamba Mfumu wa Mutende, kine Salema waikala pa mutumba. Ye Mfumu wa Yelusalema, Byo ajinga. Abyo kine byo Ajinga, Mfumu wa Yelusalema. Ko kuuba mba, Yelusalema patanshi watelelwe mba Salema, ao wajinga mutende; awa wajinga Yelusalema patanshi, kasa akyangye kutelwa mba Yelusalema ne. Aye wajinga Mfumu wa Yelusalema. Aye wajinga Mfumu wa bololoke, Mfumu wa mutende, Mfumu wa Salema. Aye kechi wajinga na shanji ne, Aye kechi wajinga na inanzi ne, Aye kechi wajinga na ntendekelo ya moba ne, Aye kechi wajinga na mpelo ya bumi ne, Aye kechi wajingapo na kisemi ne. Oo, oo, oo! Ing’anyi awe Mulongo? Mumonai Aye. Panyuma ya kupwisha nkondo, panyuma ya lushijilo, monai byo Aambile. “Kabiji Melekezendeke,” veeleshi wabu 18, kyapitala kyabu 14, Ntendekelo.

Kabiji Melekezendeke mfumu wa Salema waletete shinkwa ne binyu: kabiji wajinga ng’anga wa mwine wakila Lesa.

Kabiji wamupesheshe, ne kwamba mba, Apeshiwe Abulama wa mwine wakila Lesa, mwina jiulu ne ntanda:

Kabiji apeshiwe Lesa mwine wakila, ao wakupokolwele ku maboko a balwany bobo. Kabiji wamupele byonse bifikizha bujikumi.

⁴⁸ Twayai tutange kuyako palutwe.

Kabiji mfumu wa Sodoma waambile kwi Abulahama, Umpeko bantu, pakuuba bintu ulame obewa mwine.

Kabiji Abulama waambile ku mfumu wa Sodoma, Amiwa natanyika kuboko kwami kwi NKAMBO, Lesa mwine wakila, mwina meulu ne ntanda, (Telekai byo aipipishe kikye, hum, byo a mupelekyo!)

Namba kechi nkatambulepo mu bya kwenu nangwa tonge nangwa lutambo wa pa nkwabilo, kabiji Amiwa kechi katolapo kintu nangwa kimotu ne, nangwa kintu kimo...kuchina mwakamba mba, kabiji abya bya mubyenu, kuchina mwakamba mba, Amiwa yami na munonkesha Abulama:

Kana byonka bansongwalume byo bajapo, . . .

⁴⁹ Monai awe Melekezende Aye byo amukumenye Abulahama pa kufuma na kutapa ba mamfumu. Kyafyamika kya Lesa pano kibena kuyukanyikwa! Aye wajinga Ng'anyi? Kafwako nangwa umo. . . Abo kechi bakonsha kutanapo jishimikila Janji ne, mambo Aye kechi wajinga na shanji ne, Aye kechi wajinga na inanji ne, Aye kechi wajingapo na kimye kya Kutatwilamo ne, Aye kechi wajingapo na kimye kya Kufwilamo ne, nanchi kana Wajinga Ng'anyi ukijitu na bumi ne pano. Aye kechi wajinga na ntendekelo ne, nanchi Aye kechi wajinga muntu mukwabo ne kanatu El, Elah, Elohimu; waikalako-pabuke bwanji, waikalapabuke bwanji, Lesa Wabulume bonse!

⁵⁰ Yesu wajinga na Shanji, Yesu wajinga na inanji; Yesu wajinga na ntendekelo ya moba, Yesu wajinga na mpelo ya bumi bwa pantanda. Bino awe Muntu kechi wajinga na shanji nangwa inanji ne, amena, wabula shanji nangwa inanji. Yesu wajinga na bonse babiji Bashanji ne bainanji. Awe Muntu kechi wajingapo na bashanji nangwa bainanji ne. Amena. Kabiji Aye waubile byepi, panyuma ya kupwisha nkondo, panyuma Abulahama byo atolele kifulo kyanji?

⁵¹ Panyuma ya Kipwilo kutola kifulo Kyakyo, twaitwa kwikajikwa bu baana, monka mu Mupashi Wazhila. Kabiji inge muntu umo watola kifulo kyanji, akya kya mwichila Lesa mba obe, kabiji ne kwimana kumpelo ya mukwakwa, na kulondela balubilamo.

⁵² Patanshi, Paulo wafumyamo mikovu monka mukikye, nanchi pano, "Inge waitwa, inge kechi kyajingatu kya mu milanguluko yenu kupichila mu milanguluko ya masukuulu a mamboawama ne, inge kine wasemwa ku Mupashi, nishi Lesa wakutongwejile jimo kintendekesho kya inontanda kasa kikyangye kwikalako, bikai jizhina jobe mu Buuku wa Bumi wa Mwanamukoko, kabiji pano twaiya kyapamo na kwikala mu bifulo bya Mwiulu mwi Kilishitu Yesu. Bantu bazhila, mukoka wazhila, bantu bapusanako, bung'anga bwa bufumu, na kulambula bitapisho bya bumupashi kwi Lesa, ko kuuba

mba, bipangwa bya pakanwa ketu bipanenga lutotelo ku Jizhina Janji.”

⁵³ Bantu beya na kwamba mba, “Aba bantu baya mungi.” Kine byo baji; maana a Lesa ke bumbulwa maana ku muntu, kabiji maana a muntu ke bumbulwa maana kwi Lesa. Baikala bapusanako, umo na mukwabo.

⁵⁴ Pakuuba kine kipwilo kyayulwamo-Mupashi, kyayulamo bulume bwakwa Lesa, baikala pamo mu bifulo bya Mwiulu, na kulambula bitapisho bya bumupashi, mitotelo ya Lesa, Mupashi Wazhila kasa abena kwenda mukachi kabo, na kupima bubi ne kutela bintu biji mukachi kabo byatama, kwibyolola ne kwibyesakanya kabiji ne kubikwa pamo. Mambo aka? Kimye kyonse mu Kyeenyi kya Lesa muji akya Kitapisho kya mashi.

⁵⁵ Pano vulukai, twajikupitamo lukeelo luno. Obewa kechi wapulukile na Mashi ne, obewa *walamwa* wapuluka monka mu Mashi. Pakuuba obewa wapulukile konka ku bupe, monka mu lwitabilo, kasa Wikitabila. Lesa wakonkosheshe pa muchima obe mambo a kuuba mba Aye wakutongwejile jimo. Obewa watajile peulu kabiji wikitabijile, wikiswile. Pano Mashi alenga mfuto ya mambo ya bubi bobo. Vulukai, Naambile mba, “Lesa kechi uzachisha mubi na mambo a kulenga mambo ne.” Aye ke ndengamambo kyakutatwilapotu. Aye uzachisha Mwinakilishitu na mambo a kulenga mambo. Kabiji nanchi mambo Aye wamuzachisha, Kilishitu wasendele luzachisho lwetu. Nanchi kechi kujipo luzachisho ku boba banji mwi Kilishitu Yesu ne, aba babula kwendela mu butunshi, kana mu Mupashi. Kabiji inge wauba kintu kyatama, kechi kyakubilamotu ne. Obewa kechi ulenga mambo a mulupata ne. Muntu ulenga mambo a mulupata, uya na kulenga mambo a mulupata, aye ukyangye kwiya mu yewa Mubiji ne. Bino muntu watwelamo momwa, aye wafwa, kabiji bumi bwanji bwafiwa mwi Lesa, monka mwi Kilishitu, wabikwa katetesho ka Mupashi Wazhila, kabiji diabola kechi wakonsha kumutana ne, aye ujitu kwalepa kunyuma. Aye wafwainwa kulupukamo momwa diabola kasa akyangye kumutana ne. “Mambo obewa wafwa!”

⁵⁶ Bulai muntu wafwa mba wi kafutufutu kabiji mukamona kikobiwa. Mupatai mumbaji mumo ne kumwambila mba, “Obewa kafutufutu wakala, obewa,” aye kechi ukamba kyambo ne. Kabiji abyo ibyo, aye ukalalatu monka.

⁵⁷ Kabiji muntu wafwila mwi Kilishitu, mwakonsha kumutela mba kafutufutu, mutelai kiji kyonse kyo mukeba, aye kechi ukabukamo na mambo akikye ne. Inge ne, aye wakonsha kuya kuntu kumo na kwimulombelela. Abo ibyo. Bino, oo, bamo baji bingi na bumi. Akyo kyo Nalanguluka pa kikye, twafwainwa kuzhika bantu bafwa. Abo bafwila mwi Kilishitu, twibazhika mu meema. Bimye bimo tuzhika bantu bomi bavula,

baji na kichima ne malwang'ano, kabiji mobaji bavula bingi mu kipwilo. Bino kuuba twaabanya kyokyo ne, pakuuba Lesa wikyuba. Aye wibayuka bantu Banji. Aye wayuka mikoko Yanji. Aye wayuka jiwi jonse. Aye wayuka baana Banji. Aye wayuka Ye akonsha kwita, Aye wayuka Ye atongwejile jimo. Aye wayuka Ye apanako bibye bintu, kabiji ne kuyewa Ye abena kwiyukishako Aye mwine. Byepi Aye. . . Lesa wakonsha kubika luketekelo mu baana Banji, pa byo bakonsha kuuba, wayuka byo bafwainwa kuuba.

⁵⁸ Mwaketekela mba Lesa uba kyokyo nyi? Kika, Satana waambile kwi—kwi Yoba juba jimo. . . waambile kwi Lesa juba jimo, “Ee, Obewa uji na kalume.”

⁵⁹ Lesa waambile mba, “Kechi pajipo nangwa umo panopantanda uji nobe aye ne. Aye ke muntu walumbuluka.” Wajinga na luketekelo mwi aye.

⁶⁰ Satana waambile mba, “Oo, ee, mambo aye bintu byonse byamupeelega. Lekaitu ngikalepo nanji kimye kichechetu Amiwa nakonsha nkumulengela wimufinga Anweba ponka pa meso Enu.”

⁶¹ Aye waambile mba, “Uji mu maboko obe, bino kechi wakonsha kusenda bumi bwanji ne.” Mwamona? Kabiji aye waubile bintu byonse kanatu kukwata pa bumi bwanji ne.

⁶² Bino, oo, Yoba, mukifulo kya. . . waubile ka? Bushe wamufingile Lesa byo asendele baana banji, byo aubile bintu byonse byatama kwi aye, kabiji ne bintu byonse? Yoba kechi wajingapo na jipuzho ne. Aye wakunyikile kilungi kyanji ne kupopwela. Aleluya! Waambile mba, “Aye Yehoba ye wampele kabiji aye Yehoba waangata, jitotwe Jizhina ja Yehoba!” Abyo byobyoyo kiji.

⁶³ Lesa wayukile luketekelo Lwanji mwi Yoba. Lesa wayuka kipimo kyo Akonsha kukuketekelamo. Aye wayuka kipimo kyo Akonsha nkuketekelamo amiwa. Bino kyo tubena kwambapo kino kimye ke kwikajika yuwe mwaana.

⁶⁴ Pano, inge Baibolo. . . Inge nkondo yapwa, inge bintu byonse byapwa, pano kintu kikwabo kyalondelapo kika? Ng'anyi kintu kikwabo kyo twakonsha kuuba inge nkondo yapwa? Bushe mwayuka kyo tuuba nyi? Tukumanya Milekezendeke. Twayai tuzhikule Mateyo 16:16, bukiji bukiji, mumone kana kyokyo kiji bulongo nangwa ine. Mateyo Wazhila, kyapitala kyabu 16 kabiji veeleshi wabu 16. Amiwa nji bingi naluketekelo amba ikyo, Mateyo 16:16. Mateyo sikisi-. . . Ine, akyo kyatama, kechi kyakonsha kwikala popo pepi ne. 26:26. Oo, 16 papo, Aye ubena kwamba kwi Shimona Petelo; ndekelaiko mambo, kechi Najikutazha mukyokyo ne. 26:26, pa kijilo kyamulajilo kyapelako, akyo kyo Mbena kukeba kufikako. Mateyo, kyapitala kyabu 26 kabiji ne veeleshi wabu 26. Pano twafikapo, tuji pano, pa kijilo kya mulajilo kyapeleleko.

Kabiji byo bajilenga, Yesu watolele shinkwa, ne kumupesha, kabiji wa mutebawile ne kupana ku baana Banji babwanga, ne kwaamba mba, Tolai, muje; awe ye mubiji wami.

Kabiji watolele katomeno nako, ne pa kusanta, wibapeleko, amba, Tomai bonse;

Mambo ano o mashi ami a lulayang'ano lupya, ao aichikila bavula mukwibalekela mambo (m-a-m-b-o, mambo, Benakilishitu booba bintu byatama).

65 Kijitu bulongo, “Bino—bino . . .” Telekai, veeleshi 29.

. . .Amiwa ne mwambila namba, kechi nkatomero a bino bipangwa bya mung'anzang'anza ne, poso mu jonkaja juba jo nkeatoma angi apya ne anweba mu bufumu bwa Bataata.

66 Kika? Kintutu kimo kyaubile Milekezendeki panyuma Abulahama byo atambwile kifulo kyanji. Watachikile bantu banji mundoonda, kabiji washijile mu nkondo, ne kubwela wabwelele ku muzhi, Kabiji Melekezendeki waletete shinkwa ne binyu. Panyuma ya kupwisha nkondo, apo po tukaja Kijilo kya Masongola ne Nkambo Yesu mu ntanda ipya. Oo, jitotwe Jizhina ja Nkambo. Kijitu bulongo.

67 “Byafyamika bya mu ku muchima Wanji, monka mo kyamutokela ku muchima Wanji,” kubwela jibiji mu Efisesa, 9, “akyo Aye kyoafukwijile jimo mwi Aye mwine.”

Amba pa kufikila kwa kimye kyatongolwa . . .

68 Kabiji vulukai mba, twapichilepo. Efisesa, kyapitala kyabu 1, veeleshi wabu 10.

Amba pa kufikila kwa kimye kyatongolwa . . .

69 Pano, twafunjile mba kufikila kwa kimye kubena kupembelela ka? Kufikila kwa kimye kyatongolwa, kimye bubu po bukapwa, kimye lufu po lukapwa, kimye misongo po ikapwa, kimye bubu po bukapwa, kimye bintu byonse byatwalwa mungi (bintu byatwalwa mungi, abyo diabola byo atwala mungi) bikapwa, apo kimye akyo kine pokikapwa. Talai.

Amba pa kufikila kwa myaka yatongolwa ne kwibikonkenya pamo . . .bintu byonse mwi Kilishitu, byonse biji mwiulu, kabiji ne biji panopantanda; monka mwi aye:

70 “Kwibikokankenya bintu byonse mwi Kilishitu.” Nobe byo Najikwamba lukeelo luno, tonse tubitu tucheche twawama totutana, abye bintu bicheche bikatampe, mwakonsha kwibiwamisha monka mu Ntendekelo, mwakonsha kwi biwamisha mu Kulupuka, mwakonsha kwi biwamisha mu Benalevi, kabiji ne kwibileta pamo, kabiji mu Lumwekesho bikakokankenya kwikala Yesu. Mwatola Yosefwa, mwatola

Abulahama, mwatola Izaka, mwatola Yakoba, mwatola Davida, mwatola bonse bwa buwame, aba bantu bakwa Lesa, kabiji monaimo inge kechi mwakonsha kumona Yesu Kilishitu kasa emweshwa mu umo wa mwiabo ne. “Pakuuba mba Aye akokankenye bintu byonse mu Umo, Kilishitu Yesu.”

⁷¹ Pano, palutwe kacheche, pano mu veeleshi wabu 11.

Kabiji mwi aye mo twatambwila buswanyi, . . .

⁷² Oo, “buswanyi.” Muntu umo wakonsha kukushila kintu kimo, pakuuba mba wikiswane. Abyo ibyo nyi? Buswanyi! Ng’anyi buswanyi bo tuji nabo? Ng’anyi buswanyi bo Najinga nabo? Amiwa kechi najingapo na bumo ne. Bino Lesa washijile buswanyi Aye byo abikile jizhina jami mu Buuku wa Bumi wa Mwanamukoko kintendekesho kya inontanda saka kikyangye kwaalwa ne.

⁷³ Oo, mwaamba mba, “Pano, pembelaiko mineti umo, mulongo, Yesu waubile kyokyo kimye kyo Akufwijile.” Ine, Kechi byo aubile ne. Yesu wayishile na kupotela buswanyi bwami. Tangai walondelapo veele- . . . yeka walondelapo.

Mwi aye mo twatambwila byo kyameka . . . mo twatambwila buswani buetu, byo twatongwejilwe jimo monka mwayila kufukula kwanji aye wingila byonse monka mo atwala muchima wanji:

⁷⁴ Lesa, kitendekesho kya ino ntanda kasa kikyangye kwaalwa, byonka byo twikisenda kupita mu lufujisho, anweba bantu, byo twamona Lesa wajinga waikalako-pabuke bwanji, mwi Aye mwajinga butemwe. Mwi Aye mwajinga Lesa; kechi kwajingapo nangwa kimo kya kumupopwela Aye ne. Mwi Aye mwajinga bu Taata; amwa mwajinga . . . Aye wajingatu buke Bwanji. Mwi Aye mwajinga bu Mupulushi; kechi kwajinga kya lubilamo ne. Mwi Aye mwajinga Ubuka. Ayo yo misango ya milanguluko Yanji. Kechi kwajingapo nangwa kimo ne. Nanchi Aye Mwine Buke, Mwayila maana Anji awama mo alengejile bibye bintu, amba Aye kupichila mu yuwe Muntu umo, Kilishitu Yesu, kwibikokankenya pamo bintu ne jikwabo. Oo! “Jiso kechi jamona ne, kutwi kechi . . .” Oene mambo kyo kyaikela kintu kyafyamika!

⁷⁵ Talai, “witutongwejile jimo kububwe buswanyi.” Inge Amiwa ne buswanyi bwalumbuluka bwa kintu kimo, inge Lesa ubena kukokosha ku muchima wami ne kwaamba mba, “William Branham, Nakwichile kimye kyapita kunyuma, kintendekesho kya ino ntanda kasa kikyangye kwaalwa, na kusapwila Mamboawama,” Njina buswanyi, ke buswanyi bwa Bumi Bwapeenape. Pano, Lesa watumine Yesu amba buswanyi bwikale butuntulu kwi amiwa, mambo kechi kwajingapo kintu kyo Nakonsha kuuba mba—mba ne buswane ne. Pajinga pabula nangwa kimo ne, kyaikajikilwetu, kechi pajingapo kyo Nakonsha kuuba ne. Pakuuba mukufikila myaka yatongolwa

Lesa watumine, mu kimye Kyanji Mwine kyawama, Yesu Mwanamukoko, waipailwe kufuma ku kintendekesho kya ino ntanda. Mashi Anji aichikile pakuuba mba Nafwainwa kuya ku buswanyi bwami. Kwikala kika? Ng'anyi buswanyi? Bu baana, kwikala mwaana wa Lesa.

⁷⁶ Pano Kikye kyakonsha kwimuletela lufu. Bushe mwayuka mba bantu baikala baana bakwa Lesa ke ba lesa ba bacheche? Baanga bayuka kyokyo? Baanga bayuka mba Yesu ye waambile byobyo? Mu Baibolo, Yesu waambile mba, “Bushe mizhilo yenu kechi byo yaamba mba, ayo yine, amba anweba mwi ‘balesa’? Kabiji inge mwi batela mba balesa . . .” Akyo, Lesa kyo aambile mu Ntendekelo 2 mba ba lesa, mambo bajinga, na bunkambo pa ntanda yonse. Aye wamupele bunkambo bwa pa bintu byonse. Kabiji walubakenye bulesa bwanji, wataile kifulo kyanji kya bwaana, wataile kifulo kyanji, kabiji Satana wakitolele. Bino, mulongo, tubena kupembelela kusololwa kwa baana ba Lesa abo bakabwela na kwikitambula jibiji. Kupembelela kufikila kwa kimye kyatongolwa, kimye pilamenda po ikafika peulu, kimye kufikila kwa baana ba Lesa po kukasololwa, kimye bulume bwa Lesa po bukalupuka (aleluya) ne kwangata bulume bonse Satana bo atambwile kwi aye. Ee, mwane, bo bwanji.

⁷⁷ Aye ye Logosi wafumine kwi Lesa, akyo kine, awa wajinga Mwaana wakwa Lesa. Nanchi Aye walengele muntu ke ka lesa ka kacheche. Kabiji Aye waambile mba, “Umvwe batela aba kwaishile Kyambo kya Lesa mba, bangauzhi, inge bebatela mba ‘balesa’ ako kwaishile Kyambo kya Lesa . . .” Kabiji Lesa waambile byobyo, Aye mwine, amba bajinga balesa. Aye wamubuujile Mosesa mba, “Nakulengele kwikala lesa, kabiji ne Alona kwikala ke ngauzhi obe.” Amena. Yii! Amiwa nakonsha kuuba nobe mupopweshi walubakanako, bino kechi byo Nji ne. Oo, inge meso obe akonsha kushikuka ne kumona bibye bintu. Kijitu bulongo. Aye walengele muntu ke lesa, lesa mu ntanda yanji. Kabiji ntanda yanji yaya kufuma ku kalunga ne kufika ku kalunga, kufuma ku kitulu kufika ne kukitulu; aye wajinga na luusa pe ayo.

⁷⁸ Kabiji Yesu byo aishile, byo ajinga Lesa Umo wabula bubi ne, Aye wikishiniikishe. Kimye mwela kyo apupile, Aye waambile mba, “Mutende, zhindamaitu!” Amena. Kabiji ku kichi, Aye waambile mba, “Kafwako muntu ukajako kwi obewa ne.”

⁷⁹ “Kine, Naamba kwi anweba, anweba balesa ba bacheche, inge mwaambila yuwe mutumba, ‘Enda,’ kabiji ne kuzhinauka mu muchima obe ne, bino waketekela mba kyo waamba kisa kufikizhiwa, wakonsha kwikala nakyo kyo waamba.”

⁸⁰ Ke kubwela jibiji ku Ntendekelo, ku kitanshi, kyo kika? Pano ntanda ne bilengwa bibena kubiza, na kujila, bintu byonse bibena kwenda. Kika? Na mambo akusololwa kwa baana ba Lesa, umvwe baana bakine, baana basemwa, bayulwa baana

baamba kabiji kyambo kyabo kyapewa bukikizhi. Naketekela mba tuji ku mupaka kwakyo ponka pano. Ee, mwane. Amba ku yuwe mutumba, lekai kikale byonkabyo.

⁸¹ “Mulongo, Na—Nakebesha *kananga-ne-kananga*, kintu kimo kyubiwe. Amiwa ne waitabila mwi Yesu Kilishitu.”

⁸² “Nekipana kwi anweba mu Jizhina ja Nkambo Yesu Kilishitu.” Amena. Ako ko kusololwa.

⁸³ “Oo, mulongo, bijimwa byami bibena kuuma konse konse. Amiwa kechi naikalapo na mvula ne.”

⁸⁴ “Amiwa nkemutumina mvula, mu Jizhina ja Nkambo.” Abyo byo ikanoka. Oo, kupembelela, kubiza, bilengwa byonse bibena kupembelela kusololwa kwa baana ba kwa Lesa. Lesa wikipembelela jimo pa ntendekelo. Aye wamupele muntu pakwikala.

⁸⁵ Aye wapaine kwi Yesu Kilishitu, kabiji Yesu wikipaine mu Jizhina Janji, na lulwe luketekelo, “Ipuzhai Bataata kiji kyonse mu Jizhina Jami kabiji Amiwa ke kyuba.” Oo, Mulongo Palmer! Kupembelela kusololwa kwa baana bakwa Lesa, kifulo kyakyo, Kipwilo!

⁸⁶ Byonka byo Naambile, Buuku wa Efisesa ye Buuku wakwa Yoshiwa, kabiji Yoshiwa wabikilenga bantu pa bifulo byabo. Pano, inge babula kwimana, kabiji aye wabika Efulemu *papo*, kabiji kokwa pa mushiji wa kwa Manase, kabiji *awe* umo wakonsha kwiya wazhingila kabiji mukwabo waamba byatama, bakekala byepi bulongo? inge umo ubena kwamba mba, “Amiwa ne Baptist, Amiwa ne Methodist, Amiwa ne Pentekosito, Amiwa ne Buumo, Amiwa ne Bu bubiji, Amiwa ne *Bikananga-ne-bikananga*.”

⁸⁷ Musa kwikyuba byepi? Imanaitu nzoo! Lesa ubena kukeba kwikajika Kipwilo Kyanji pakifulo, baana babalume ne babakazhi bakwa Lesa. Lesa, ndekai ngikale na bumi ke kimone, yo milombelo yami. Kiji bingi pepi poso Nakonsha kwikyumvwa na maboko ami, kyamweka nobe byokiji. Kijitu ponkapa. Akyo byo Mbena kukabila kumona, kupembelela kimye kya kuuba mba ubena kwenda mu mukwakwa, watana kilema walala byobya, kufumatu munda mu bainanji, “Siliva ne golonde Amiwa kechi Njinabyo ne.” Oo, kupembelela kusololwa kwa baana ba Lesa, aleluya, kimye Lesa kyo akayukanyikwa Aye mwine, kimye kyo bakakanya misongo, bakakanya kaasa, bakakanya bikola.

⁸⁸ Anweba mwalanguluka mba kaasa kintu nyi? Aye Baibolo waamba mba kuji kimye kibena kwiya bantu bakabolelanga mu mibiji yabo, kabiji bang’onyi bakajanga nyama yabo kasa bakyangye ne kufwa. Kaasa ujitu pamo nobe mutoba ku kibena kwiya. Bino, vulukai, akya kintu kyatama bingi bekikanyinye kufika ku booba baji na Katetesho kakwa Lesa. Abyo byo tubena kukanamina pakino kimye, kutwelamo ne kwikajikwa

mu Bufumu bwa Lesa myalo yakatazha kasa ikyangye kufika. Oo, kyawama bingi! Nkulo ya kimye kyatongolwa, kufikila kwa myaka yatongolwa, buswanyani.

Mwi aye mo muji. . . mo twatambula. . . buswanyani, byo twatongwejilwe jimo. . .

⁸⁹ Buswanyani bwetu bwapainwe byepi kwi atweba, kupichila mukika? Kutongwelwa jimo. Kutongwelwa jimo ke kuyukilwa jimo. Nanchi Lesa wayukile byepi mba Aye ukakuketekela kwikala musapwishi? Kuyukilajimo kwanji. “Kechi kyayewa usaka nangwa yewa unyema ne, nangwa aye. . . Ke Lesa ye ubila lusa.” Abyo ibyo, kutongwelwa jimo. Aye wayukile biji mwi obewa. Aye wayukile biji mwi obewa kasa ukyangye kwiya pantanda ne. Aye wayukile biji mwi obewa kasa kuyangye kwikala ino ntanda pakuuba mba obewa wiye wikalepo. Ao—ao ye Aye. Awo ye Lesa wayukila jimo bintu byonse, wayukila jimo. Atweba kechi twayukila jimo ne, atweba tulangulukatu bijipo.

⁹⁰ Kyaikala kyanemena bingi, kufumatu ku kyokya kyamwekele kwi amiwa. Amiwa kechi nayuka ne. Inge Nalanguluka kokwa, byo Naimene byobya pa bimye bicheche bya lusekelo, kabiji nalangulukile mba, “Kechi kuji keesha ne.” Kechi kwajinga keesha, kechi kujipo misongo, kechi kujipo bulanda ne. Kechi kujipo lusekelo lucheche ne, nanchi ke lusekelo lonse lwabaya; ke lusekelo lonse. Oo, ami! Oo, byo Naimene popa kabiji Naambile mba, “Akye kyo kika?”

⁹¹ Aja Jiwi jaambile mba, “Abwe ke butemwe bwapwijijika, kabiji ne byonse byo watenenwe kabiji ne byonse byakutemenwe uji nabyo kuno.”

⁹² “Kabiji obewa uketupana atweba kwi Nkambo Yesu kimye Aye kyo akeya, nobe michinya ya mwingilo obe.” Namwene aba banabakazhi balamba kasa baimana byobya, bonse nakukwata ne kubijika, “Wami wawama, mutemwe mulongo!” Namwene aba banabalume na yoya suki yazakala yafika ne mushingo mumwe, babena kunyema, nkukwata amiwa ne kwamba mba, “Mutemwe wetu mulongo!”

Kabiji Nalangulukile mba, “Akye kyalumbulula ka?”

Aye waambile mba, “Abo ke bantu bobo.”

⁹³ Naambile mba, “Bantu bami? Kechi kwakonsha kwikala ba Branham bavula byobya ne, baji ma milyoni.”

⁹⁴ Aye waambile mba, “Abo ke baitabila bobo!” Aleluya! “Abo ke baitabila bobo. Abo boboba. . .” Naambile mba, “Mwamona yewa umo waimana papo?” Mwanamukazhi walamba bingi Ye namonapo kala. Waambile mba, “Wajinga na myaka yapita pa naite kimye kyo wamutangijile kuya kwi Lesa. Oene mambo kyo abena kujijila, ‘Mulongo wami mutemwe.’” Waambile mba, “Aye kechi ukakota jibiji ne. Aye wapitaila kufuma ku kyokya. Aye uji mu kimye kya bwanyike. Aye waimana papo. Aye kechi

wakonsha kutoma meema atalala ne, kechi ubena kwi akeba ne. Aye kechi wakonsha kulala panshi ne kulala ne, mambo kechi wikala wakoka ne. Kechi kuji keesha ne, nangwa japita ne, kafwako kijiko ne. Tuji mu Peenape pakino kimye. Bino juba jimo ja lukumo Mwaana wa Lesa ukafika, kabiji ukachibilwa mambo monka mwaila Kyambo kyo wasapwijilenga kwi abo.” Oo, mulongo!

Naambile mba, “Bushe Paulo ukaleta jibumba janji nyi?”

“Ee, mwane.”

⁹⁵ Naambile mba, “Amiwa Neasapwijile byonka Paulo byo Eambile. Amiwa kechi nafumineko ne, Amiwa kechi nayile mu mafunjisho a mu kipwilo kiji kyonse ne nangwa kikwabotu ne. Naikele musango umo.”

⁹⁶ Kabiji bonse babijikiletu mumo, “Twayuka kyokyo! Tubena kukokoloka na luketekelo.” Baambile mba, “Obewa uketupana atweba kwi Aye, kabiji atweba bonse tukabwela pantanda jibiji, na kwikala myaka ne myaka.” Oo, ami!

⁹⁷ Ponkapotu Natatwile kuya. Natajile, nalala popa pa mwanya, kabiji Namwene mubiji wami wakala wakota ne mikonya, kabiji wivunga-peulu ne—ne misango kabiji wamanyikwa, kabiji Namwene maboko ami kunyuma ya mutwe wami, kabiji Nalangulukile mba, “Oo, Nakonsha kubwela mu kyokya kintu jibiji?”

⁹⁸ Kabiji Natwajijiletu na kumvwa joja Jiwi, “Twajijilatu na kuya kulutwe! Twajijilatu na kuya kulutwe!”

⁹⁹ Naambile mba, “Nkambo, Amiwa kimye kyonse ketekela lubuko lwa Bulesa, Amiwa katwajijilatu na kuketekela. Bino Amiwa katwajijilatu na yoya myeo, nanchi kwashai. Amiwa kekala na bavula kokwa Nkoba... Lekai ngikale na bumi, Nkambo, kabiji kabikapo milyoni mukwabo, inge Anweba mwakonsha kundeka naikala na bumi.”

¹⁰⁰ Amiwa kechi natako muchima kana ng’anyi mushobo, ng’anyi lufunjisho, ng’anyi kyaalo, byo baji, bonse bajitu pamo inge bafika kokwa, kabiji aya milaini ya mipaka yapita. Oo, Nakonsha kumona booba banabakazhi, balamba bingi; kechi na kimonapo... yafikile panshi, suki yalepa yafika munyuma yabo. Masiketi alepa kufika panshi. Bajingatu kwakubula kwabilo. Monai booba banabalume baji na suki yazakala yafika mushingo, mitwe yachila, mitwe ifita, kabiji ne misombelo yapusanapusana. Kabiji babikilenga maboko abo kuzhokolosha. Amiwa ne bomvwinenga nkukwata. Naumwine maboko abo. Lesa ye Mutonyi wami, ne yuwe Buuku wazhila wazhikulwa. Nebomvwinenga nobe byonka byo Mbena kumvwa maboko ami pa kilungi kyami. Bakumbachilenga maboko abo kuzhokoloka, kafwako ngumvwino ya banabakazhi byonka byotuji pakino kimye ne. Amiwa kechi nasakamana nangwa wikale wazhila byepi, yobe ng’anyi, kana wing’anyi musango wa

musapwishi, pulisiti nangwa monse mo waikelamo, kechi kujipo mwanamulume wakonsha kuleka wamukazhi kumukumbata, kwakubula kwikala na ng'umvwino ya bumuntu ne. Abo bo bukine. Bino, mulongo, umvwe wapita pakachi ya peulu ne kuno, kechi kiji byobyoko kokwa ne. Oo, ami! Byo kiji. . . Oo, kuji. . . Kechi kyakonsheka ne. Ke butemwetu bonse. Bintu byonse ke byakine mulongo kabiji bintu byonse ke byakine nyenga. Kechi kujipo lufu ne, kafwako bulanda ne, kafwako kichima ne, kafwako nangwa kimo ne, kafwako kyakonsha kutwela momwa ne. Ke kyalumbulukatu. Akyo kyo Mbena kulwisha. Akyo kyo Mbena kukanamina.

¹⁰¹ Naambile mba, “Anweba Nkambo, akyo kyo Naishila kuno ku kipwilo, na kweseka kubika kipwilo mundonda.” Kukubuula mba, mulongo ne nyenga, kujitu kintu kimo kyakonsha kutwelamo, ke butemwe bwalumbuluka. Kechi mambo obewa wanekenena Branham Tabernacle ne, nangwa kipwilo kya Methodist nangwa kipwilo kya Baptist ne. Bonse bajitu bulongo, byo wafwainwa kwikala. Bino, oo, balunda, muji na. . . Kechi mambo waambilepo na jimi ne, wazhile mu Mupashi ne, mambo wapanga badiabola nangwa waendesha mitumba na lwitabilo ne. Abyo byonse bijitu bulongo, akyo kijitu bulongo, nangwa byonkabyo kanatu abwa butemwe bwalumbuluka bwaikala momwa. Akwa iko kwajinga butemwe bwalumbuluka. Kabiji akya kyo kyonka kintu kikakutwezhamo. Akyo kyo kyonka kyakonsha kwikala momwa, kyo kyonka kintu kyajingako, kokwa. Oo ami! Ke kwalulwabubana. Lesa, kintendekesho kya ino ntanda kasa kikyanyge kulengwa!

¹⁰² Pano, twayai tupelawizhe, twayai tutole kikye kyapitala kimo, nangwa byonkabyo, inge kyakonsheka, mu mamineti teni alondelapo.

*Mwi aye motwamwena buswanyi bwetu. . .
(Twaswana ka? Bumi bwa Peenape.) . . . byo
twtongwelwa jimo. . .*

Pano byepi? Bushe bonse mwaumvwa kyokyo nyi? Bushe mwamwichile Lesa nyi? Ine, Lesa wimwichile. Bantu bamo baamba mba, “Oo, Amiwa namukebele Lesa, kabiji Lesa namukebele.”

Anweba kechi. Kafwako nangwa muntu umo wamukebele Lesa ne. Kana Lesa kukeba muntu. Yesu waambile mba, “Kafwako muntu wakonsha kwiya kwi Amiwa ne kanatu Ba Taata bamukoka patanshi.” Monai, ke kitemwa kya muntu kya kunyema Lesa. Kabiji waamba mba pano. . .

¹⁰³ Akyo, akyo kyo kindetela kijikila, nangwa, kusapwila kwi anweba bantu; kechi mwafwainwa kutwajijila na musango umo ye mwaikalamo ne, pano alulukai! Ng'umvwai amiwa byo Mbena kwikyamba, ABYO BYOBYAAMBWA AYE NKAMBO. Amiwa kechi netelapo kikye amiwa mwine ne, Amiwa kechi

byoji ne. Bino anweba mungita mba ne ngauzhi wenu, nangwa ngauzhi. Ntanda yonse yaketekela kyokyo, kuzhokoloka ntanda yonse, ma milyoni ne ma milyoni ne ma milyoni a bantu. Amiwa ne kyamba patoka kabiji ne bufyafya ku bantu teni nangwa—teni nangwa twelufu milyoni wa bantu, nangwa bavula, kwamba kwakushinkamana. Amiwa namona makumi a biumbi bya bimwesho ne biyukilo ne byakukumya, kabiji kafwako nangwa kimo kyakakalwa ne. Kabiji abyo ibyo. Aye wambulapo bintu byabula kukakalwapo kumweka. Amiwa nakonsha kuleta muntu uji yense mu kwesekwa pakyokyo. Abyo ibyo. Amiwa kechi ng’amba mba ne ngauzhi ne, bino anweba muteleka kwi amiwa.

¹⁰⁴ ABYO BYOBYAAMBA AYE NKAMBO, kisendatu butemwe bwalumbuluka pakuuba mba obewa ubikwe mukyokyo kifulo, mambo byo byonka byajingako. Kechi mambo nangwa mali, nangwa mumwesho byepi bupopweshi, nangwa mwauba byubilo byawama byepi nangwa biji byonse byo mwauba, abyo kechi bikengilapo nangwa kimo pa joja juba ne. Kisendatu butemwe bwalumbuluka. Nanchi kyonse kyo muuba, kibikaitu pa lubaji lwa bintu byonse bikwabo poso wayuzhiwamo na butemwe bwa Lesa poso wakonsha kutemwa aba bemushikwa.

¹⁰⁵ Amiwa naubatu, nobe byonka byo Najikwamba lukeelo luno, Nalengelwe, kulengwa-kwami konse ke lusatu. Bantu bavula baamba mba, “Pano, nkwanja munyuma yami kabiji ne amiwa nsakukwanja mobe. Ee, ngubilai kintu kimo kabiji ne Amiwa nkemubilapo kintu kimo.” Alo kechi lusa ne. Lusa ke luno, inge nyuma yobe ibena kubabana, Amiwa sakwiyikwanja, nangwatu mwakwanja nangwa ne; wakonsha kung’imba lupi mu kilungi, ne kwamba mba “nyuma yami ibena kubaba- . . . , nangwa, ibena kukabila kukwanja,” Amiwa nsakwiyikwanja. Mwamona? Byokiji, ubaipo kintu kimo. Amiwa kechi naketekela mu mingilo ne. Amiwa naketekela mba mingilo ke butemwe. Mingilo ke—mingilo ke kusololwa kwa kwamba mba lusa lwa ubiwa. Amiwa kechi ngikala wakishika ku mukazhami mambo Naketekela aye wakonsha nkukana inge Nabula kwikala, Ngikala wakishika kwi aye mambo Namutemwa.

¹⁰⁶ Amiwa kechi nsapwila Mamboawama mambo Akulanguluka mba Nakonsha kuya ku gehena inge Nabula kwikyuba ne, Amiwa nsapwila Mamboawama mambo Namutemwa Aye. Kyakine. Anweba mwalanguluka mba Nakonsha kukilang’anya atwa tulunga twa meema, aa mandeke alelauka, kabiji ne kubesha konse konse, kabiji—kabiji ne bintu byonse bikwabo, kabiji pa mineti uji yense. . . kabiji muntu yense kasa abijika, kabiji “Obewa Maliya” ubena kubiwa monka mundeke, ne bintutu bikwabo? Aba bantu kasa babena kupepeela mu mishipi ya bukikizhi, kabiji akwe wendesha ndeke na kwamba mba, “Tuji na mafuta avula a kutayapo mamineti fifitiini, kechi nayuka po twafika ne.”

Bushe walanguluka mba Nakonsha kuuba kyokyo na—na mambotu kisangajimbwe nyi? Uu! Mwakonsha kulanguluka mba Nakonsha kuya momwa mu jisaka amo bashilikale bena German mo bakumbachilenga maboko nobe *bibye* kila bufuku kutwatala mukachi ne kundupula pangye, poso Mupashi Wazhila watatula kwingila mingilo yabulume? Bakomyunisiti baikala na bitajilo bufuku, na kukeba kundoza palepa mailoshi umo. Mwalanguluka mba Nakonsha kuuba kyokya kukebatu kuuba bisela nyi? Mambo kintu kimo mwi amiwa kiyatemwa; ke bantu Kilishitu boafwijile. Paulo waambile mba, “Amiwa kechi mbena kuswatu kuya ku Yelusalema ne, bino Amiwa mbena kuya konkwa na kumpopwa. Amiwa mbena na kufwa. Amiwa mbena kuya konka na kufwila pe Nkambo.” Ke kintu kimo, butemwe bo bukambizha, bo bukulengela. Abyo kine ibyo.

¹⁰⁷ Inge Nakonsha kusapwila Mamboawama na mambo a mali, inge kyafwainwa kwikala, Amiwa inge kechi njina nkongole tweti sauzande madolla bufuku bunu ne, Amiwa inge kechi naikala mu nkongole ne. Ine, mwane. Mambo inge Nalama amo ma—amo ma milyoni obampa. Muntu umo, muntu umo watumine ba FBI bamingilo na kipepala kya mali milyoni-faivi-aduleendi-sauzande-dolla. Kabiji Naambile mba, “Kibwezhai.” Kechi kya mali ne! Kechi mali ne. Amiwa kechi nsapwila Mamboawama na mali ne. Kechi na mambo a kyokyo ne!

¹⁰⁸ Ke mambo a butemwe. Kintu kyo Mbena kukeba kuuba, ke, inge Naabuka bushiya bwa mpemeno yapelako, ayo yakonsha kwikala mu mamineti faivi kufuma pa kino kimye, kyakonsha kwikala mu maawala abiji kufuma pakino kimye, kyakonsha kwikala myaka fifite kufuma pa kino kimye, Amiwa kechi nayuka kimye po kikobiwa ne. Bino umvwe kyaubiwa, Nafika konka, Nkakeba kukumona mu buuya bwanyike boobe, na kunyema, ne kubijika, “Mutemwe wami mulongo! Mulongo wami!” Abyo byobiji mu muchima wami. Oene mambo. Amiwa kechi ngeseka kupachika nobe pakuuba mba—pakuuba mba tupusane ne, bino Mbena kweseka kukubika mu jishinda jiji bulongo. Ajo jo jishinda ja kutwelelamo. Kechi kipwilo kyobe ne, kechi dinominesheni obe ne, kana kusemwa nkobe mwi Kilishitu. Oo, ami! Yii!

*Mwi aye . . . mo muji . . . buswanyi, byo twatongwejilwe
jimo monka mwayila kukeba kwanji aye wingila bintu
byonse monka mwayila muchima wanji:*

¹⁰⁹ Telekai. Tusakuleka mu mamineti acheche. Telekeshai bulongo kasa tukyangye kushiika.

*Amba twikale kutotwa kwa lukumo lwanji, abo
patanshi baketekejile . . . Kilishitu.*

Mwi aye ne atweba motwaketejile, . . .

¹¹⁰ Pano monai kikye, pepi pepi. Mvwalai majaketi enu, majaketi a Mamboawama. Matwi enu ekale ashikuka, telekeshai bulongo. Amiwa nji pa veeleshi wabu 13.

Mwi aye ne atweba mo twaketekejile, panyuma ya kumvwa...

“Lwitabilo lwiya pa...” [Kipwilo kyaamba mba, “Kumvwa.”—Waku.] “kumvwa...” [“Kyambo.”] “Kyambo kya...” [“Lesa.”]

...panyuma ya kumvwa kyambo kya bukine,...

¹¹¹ Bukine Bobuka? Ke Kyambo kya Lesa. Abyo ibyo nyi? Yoano 17:17, anweba mubena kunemba Binembelo, Yesu waambile mba, “Bazhijikai, Taata, kupichila mu Bukine. Kyambo Kyenu bo Bukine.”

...panyuma...ya kumvwa...bukine, o mamboawama a lupulukilo lobe:...

¹¹² Ing’anyi lupulukilo lo ebabujilenga? Kutongwelwa jimo kintendekesho kya inontanda kasa kikyangye kulengwa (Abyo ibyo nyi?), kwalulwa bu baana, batongwejiwe jimo ku Bumi bwa Peenape. Pano, panyuma ya kwiya mu Bumi Bwapeenape, panyuma ya kupuluka, kuzhijikwa, wayulwa na Mupashi Wazhila, anweba mwi baana. Pano Lesa ubena kukeba kukwikajika mu kifulo kyobe, oo, pakuuba mba wakonsha kwingijila Bufumu Bwanji ne lukumo Lwanji.

¹¹³ Ao o Mamboawama. Kwikala, patanshi, kumvwa Kyambo, “Walapila, ne kubatizhiwa mu Jizhina ja Yesu Kilishitu mululekelo lwa mambo.” Kufumya bubi bobbe bonse, witenga pa Jizhina ja Nkambo Yesu Kilishitu, ne kuya ku Ntanda yamulaye. Awa mulaye wa yense kang’enda uji mu jishinda jobe. Inge wafuma ku nzubo yobe bufuku buno, ndengamambo, ne kwamba mba, “Amiwa nsakuya ku Branham Tabernacle,” Lesa wimupa jishuko bufuku buno. Pajipo kintu kimo kyabikwa pakachi kenu ne Ntanda yamulaye. Ntanda yamulaye kyo Kika? Ye Mupashi Wazhila. Kyabikilwe pakachi ka kwa Yoshiwa ne ntanda yamulaye kyajinga Yondano. Kine ibyo.

¹¹⁴ Mosesa, byo ajinga kipasha kya Kilishitu, watangijile baana kuya ku ntanda yamulaye, bino Mosesa kechi watwezhezhe baana mu ntanda ya mulaye ne. Yoshiwa ye watwezhezhe bantu ne kwabanya ntanda. Yesu walipijile mutengo, wibatangijile kuya ku Mupashi Wazhila. Lesa watumine Mupashi Wazhila panshi kabiji Aye waikezhe kipwilo mu kifulo kyakyo, muntu umo, ku muyuzha na Kyeenyi kya Buntu Bwanji. Mwamona mo Nekitazha nyi? Byonse mwi Kilishitu Yesu, amo Lesa mo atongwejile jimo kikye mu kwitwa kwa ao Mamboawama!

¹¹⁵ Paulo, Galatiya 1:8, amba, “Inge Malaika waiya wasapwila kintutu kikwabo, mulekai ekale wafingwa.” Abo Bukine, bwa

Mamboawama. Pano telekai bulongo byo tubena kutanga, mu kupwisha veeleshi.

...o mamboawama a lupulukilo lwenu: mwi aye ne anweba... (Telekeshai bulongo)...panyuma ya kwitabila, mo mwabikijilwe katetesho ka Mupashi Wazhila wa mulaye,

¹¹⁶ Mu moba akupelako, Baibolo waamba mba, pano monai, mu moba apelako kukekala misango ya bantu ibiji. Umo wa mwabiyo ukekala na Katetesho kakwa Lesa, mukwabo na kiyukilo kya lukinyama. Abyo ibyo nyi? Baanga bayuka kyokyo? Kyawama, inge Katetesho kakwa Lesa ke Katetesho ka... Inge Katetesho kakwa Lesa ke Mupashi Wazhila, nanchi kwakubula Mupashi Wazhila kyo kiyukilo kya lukinyama. Kabiji Baibolo waamba mba aya mipashi ibiji ikekala bingi peepi pepi kyakuuba mba ukajimbaika bonka Basalululwa inge kyakonsheka kubiwa. Kechi kyakonsheka kubiwa byobyo ne, mambo basajijilwe ku Bumi Bwapeenape. Mwamona?

¹¹⁷ Kipwilo kibena kuya, kasa kyayuka mba kuji bisungu jikumi byayile na kukumanya Nkambo, bonse bazhijikwa, bonse bazhila, yense mwi abo wazhijikwa. Batanu bajinga bakatende kabiji balekele byeya byabo byazhima. Batanu bajinga na manyi mu malapi abo. "Kabiji, talai Musongoshi awo wiya!" Kabiji aba batanu bajinga na manyi mu malapi abo batwelele mu Kijilo kya Masongola. Kabiji bakwabo bashijile pangye apo pajinga kujila ne miteto kabiji ne kwisuma kwa meno. Ikalai benengezha, mambo kechi mwayuka kimye Nkambo kyo akeya ne. Baji... Nga maanyi aimenako ka mu Baibolo? Mupashi Wazhila.

¹¹⁸ Pano kwi anweba leelo, anweba Mulondela juba-Jabutanu na bubiji amba juba ja butanu na bubiji ko Katetesho kakwa Lesa, letaipo Kinembelo kimo kya kushiniikisha kyokyo. Aye Baibolo waamba mba Katetesho kakwa Lesa ke Mupashi Wazhila. Monai kikye. "Akyo..." Monai veeleshi wabu 13 pano.

...panyuma ya kuketekela, obewa wabikilwe katetesho ka—ka Mupashi wazhila wa mulaye.

¹¹⁹ Yai mu Efisesa 4:30, Naketekela mba byo kiji. Monai inge kechi twakonsha kufika pa 4:30 ne, monai inge akye kechi kyo kimo ne. Efisesa, kyapitala kyabu 4 ne veeleshi wabu 30. Ee, byo kiji, 4:30.

Kabiji kechi mumufichishe pa muchima Mupashi Wazhila wakwa Lesa ne, imo mo mwabikijilwe katetesho kufika ne ku juba ja bukuzhi.

¹²⁰ Bimye binga? Umvwe kine, kine mwatambula Mupashi Wazhila, Ukekala mwi anweba bimye binga? Kufika ku kusangululwa kwalondelapo, poso bankambo babakazhi baiya nkoji, poso bantangi bakufumyamo nyi? Poso juba ja bukuzhi bwenu! Aleluya!

¹²¹ Panyuma ya kufwa, panyuma ya kutwelamo muyoya Ntanda, kya kuuba mba waimana kokwa na batemwe benu, obewa wakiyuzhiwatu na Mupashi Wazhila. Kinembelo! Ujitu pamo nobe byonka byo uji kino kimye, bino obewa uji na... obewa watutulwilwa mu mubiji mukwabo. Obewa wapipulatu manzubu. Awe uji na byakala, kechi mwakonsha kubikapo kintu kikwabo ne, bisomo byabolele. Abyo ibyo. Nanchi nwafwainwa kufumyapo bintu byakala ne kwibileka byabola, ne kuya mu kyakatakata. Abyo ibyo nyi? “Mambo inge uno tente wa pantanda wapopololwa, tuji na mukwabo ubena kupembelela.”

¹²² Mwavuluka juba jikwabo, twapichile mukyokyo? Kimye ka mwaana kakacheche byo kalengwa munda mu bainako, kabiji kamubiji kenda ne kupataula ne kutolauka kabiji ne bikwabotu. Bino umvwe bainanji bamulakashatu awa mwaana pantanda, kintu kitanshi, kuji mubiji wa bumupashi pakuuba mba atambulwile mubiji mucheche. Kapepo dokotala wikapa... [Mulongo Branham watota maboko anji—Waku.] nobe *byobyaya*, nangwa kintu kimo kyakwikasukanya, kabiji “Whaah, whaah, whaah!” Kabiji ponkapotu ke kuya ku mabele aba inanji, “um, um, um,” ke kwendesha ka mutwe kanji kacheche peulu ne panshi ku jibele ja bainanji, pakuuba mba mishipeshipe ilete mukaka.

¹²³ Kana ka ng’ombe, aku kasemwatu kufuma munda mwa inanji, kafukamina mu manungo ako pa kupitapo mamineti acheche. Kika kyo kakonsha kuuba? Kenda kubwela, ne kukwata inanko, kabiji katatula kusukanya mutwe wanji mucheche panshi-ne-peulu byobyaya, kabiji katambula mukaka wanko. Aleluya! Ee, mwane.

¹²⁴ Umvwe yuwe mubiji wa nyama ne mashi waiya mwaiye, kuji mubiji wa bumupashi wikapembelela.

¹²⁵ Kabiji awe mubiji wa nyama ne mashi waponena pa mushiji, aleluya, kuji umo ubena kupembelela! Atweba kwendatu kufuma mu umo ne kuya mu mukwabo, tupipulatu bifulo bya kwikalamo. Awe ubola wafwainwa kumvwala ubula kubola, awe wa bumupashi; awe ubola umvwala ubula kubola. Awe wakala wa mikafi, uchepana, mubiji wanyana, bino kechi upipula mwekelo yanji ne, Nalumbulula mba inge wafika kokwa, ukekala na mupashi yenka umotu.

¹²⁶ Lekai ne mubule kintu kimo kicheche kibena kumvwanika kuzhobakana kwi anweba, bino ke Baibolo, nanchi Amiwa nkemupa kimo kyabula kuzhobakana. Monai kikye. Kimye mukulumpe Saulo, aye—aye mfumu, awa—awa wakala, awa mukatampe musapwishi wa dinominesheni pa kyokya kimye, mwayukatu, awa wajinga na mutwe ne mapuzhi aji peulu kukila pa bonse, kabiji wajinga na moyo, abo kechi bayukilepo nangwa kimo kya Bulesa ne. Davida waishile na kupokolola mwanamukoko kufuma mukanwa ka bokwe, waipaya Golyata.

Mumonai. Aye wafumineko kwi Lesa, aye wakebelenga yuwe musapwishi wakyongo-kyazhila. Kabiji mukifulo kya kwikala wa kulubaji lwanji, na kweseka ku mukwasha, aye wamwalukijile. Inge akyo kechi kyo kipikichala ne, kine kyo kipikichala! Waalulukile kufuma kwi aye!

¹²⁷ Baanga bajinga muno kimye kyo Nafuminepo pa lwendo lwami lutanshi, kabiji nasapwijile, “Davida kwipaya Golyata,” byo Nafuminepo? Bavula, bamo, bakala babanda. Amiwa mbena kunengezha kufumapo ne jikwabo. Vulukai kika, mwamona kyaishile Pamulungu wapita? Kibena kuya mu musango mukwabo. Davida kipekenyi kyanji kyabubiji, kipungu kyabubiji kya nyingijilo yanji. Abyo kine ibyo. Akyo, nanchi aye waikele mfumu wa Isalela. Monai ng’ingijilo pakino kimye ibena kwenda mu musango wa bubiji mukatampe, ke mufume kintu kikatampe. Nanchi byo aubile Davida. Namona yuwe byo abena kwiya, Davida, oo, kimye Lesa kyo ajinga na Davida pa kwipaya bokwe, monai, kabiji waipaille mbeyala, kabiji waipaya mwina Filisitiya. Pano, kwajinga kimye Lesa kyo apaine mupashi watama pa yuwe nsongwalume mukulumpe. Kabiji wa . . . Wa ka? Kushikwa Davida. Kabiji Naketekela . . .

¹²⁸ Pano, ao matepu. Pano telekai, balongo, anweba muji pa ao matepu, inge mwapusenamo ne amiwa, mwandekelako mambo. Monai, Nemutemwa anweba. Amiwa kemukumanya kokwa nangwa byonkabyo, monai, mambo inge wi muntu wakwa Lesa Amiwa nkakukumanya nangwa byonkabyo. Bino, Nasaka kwamba kikye, ao oum mambo: Mambotu akuuba mba Saulo wamwene mba Davida wajinga na kintu kimo kyo abujile aye. Nanchi kika kyamwekele?

¹²⁹ Wajinga mucheche wakala “wakosakana,” ye babena kundosa, Baibolo waamba mba wajinga “wakosakana.” Aye kechi wajinga mwaana walamba ne, “wakosakana” ke mulongo mucheche wa mubiji-wakosakana. Kabiji aye waile kokwa, kabiji Saulo, kika, wabikile bya nkondo byakwa Saulo pe aye, kabiji Nalanguluka mba jikebo jafikile ne kumaulu anji. Kabiji waambile mba, “Mvulai bibye bintu. Ami—Ami njina . . .” Kapepo wamupele digili wabu dokotala, Ph.D. nangwa L.L.D., nangwa kintu kimo, mwayukatu. Aye waambile mba, “Amiwa kechi nayukapo kintu pa bibye bintu ne, mambo Amiwa kechi ne bishinikisha ne. Lekai ngikale na kikye, kyo Nayuka kyo Mbena kwingila nakyo.” Ee, mwane. Aye watolele malekenyi.

¹³⁰ Kabiji balengejile Davida kwikala wakonya mambo baana babakazhi, bipwilo, bipwilo byaambilenga, “Saulo, wafwaijlwe kwipaya biumbi, pakuuba Davida waipale makumi a biumbi.”

¹³¹ Nanchi aye waikele na kichima, “Ke yewa musango wakala wa Jizhina ja Yesu, kafwako kintu kimo Kijiko ne.” Abyo ibyo. Kabiji Lesa waubile byepi kwi aye? Lesa watumine mupashi

watama pe aye, wa kushikwa Davida, kabiji wamushikilwe Davida pakubula mambo ne.

¹³² Davida wafwaijilwe kuzhonda shingo yanji mu bimye bicheche. Aye wafwaijilwe, bino wikileketu. Aye kechi waambilepo kintu nangwa kimo ne. Aye kine wafwaijilwe kwikyuba. Aye waile nakuchibako mukila wa konchi wanji, bufuku bumo, wabwelele, ne kwamba mba, “Tala kuno, mwamona!” Ee, mwane, wafwaijilwe kwi kyuba, bino wamuleketu buke bwaji. Aye wafwaijilwe konauna kipwilo kyanji ne kwibapalang’anya, ne kutatula kabungwe kanji aye mwine inge wakebelenga. Bino aye kechi wikyubile ne, aye waleketu Saulo kasa aya. Waleka Lesa ye ke alwe nkondo. Ee, mwane.

¹³³ Nanchi waile wakapwishishe ne kipekenyi, kabiji watambwile, awa mupashi watama waikete pe Saulo pakuuba mba abule kutambula mukumbu kufuma kwi Lesa. Pakupitapo kimye kicheche aye. . . Mupashi wakwa Nkambo wafumine pe aye. Kabiji Samwela mukote, yeka ye babujile kukokela, yenka wajinga Jiwi ja Lesa kwi abo, awa umo waambile kwi abo kasa bakyangye kukeba kuuba byubilo bya mu ntanda ne. . .

¹³⁴ Ibyepi kipwilo kukeba kuuba byubilo bya mu ntanda? Kika ba Pentekosito, babatizhilenga, bapitamo mu bya Mupashi Wazhila ba Methodist, ne ba Baptist, ne Presbyterian bakeba kwimweshwa nobe ntanda? Kika kyo bobila kikye? Amiwa kechi nayuka ne. Amiwa—Amiwa kechi nakonsha kwi kyumvwa ne. Mwamba mba, “Kyawama, ke kintu kyamyendeleo kwikyuba, ke kuyatu pacheche, ke peni mucheche,” monse momwikitelela. Ke bubi. Obewa kechi wafwainwa kwikala nabyo bintu mu nzubo yobe ne. “Kika, kechi kiji na lukatazho pa kutomapo komoki imo ya malwa ne. Tujitu na tucheche. Amiwa ne bakazhi bami tujitu na tucheche mute uno.” Kabiji kintu kitanshi mwayukatu, baana benu bajitu na tucheche. Kine byokiji.

¹³⁵ Kabiji anweba banabakazhi, hum, badiabola balengatu. . . Abyo byo aubile kuntendekelo, kabiji aye kine walenga ke pakufikila mwi anweba banyenga. Aye ubatu kyokyo pakuuba mba. . . mambo aye wayuka kyo akonsha kuuba. Wakonsha kujimbaika mwanamukazhi bimye masauzande bukiji bukiji kukila mwanamulume. Nayuka mba akyo kikoza milanguluko yenu, nangwa byonkabyo ke Bukine. Abyo kine ibyo. Abyo byo aubile mu bujimi bwa Edena. Aye wakonsha kulengela. . . Pano, aye wajinga wabukishika, aye wajinga wabulamo bujimbijimbi, bino aye wajimbaikilwe. “Adama kechi wajimbaikilwe ne,” aye Baibolo byo byo aamba. Aye kechi wajimbaikilwe ne, pakuuba mukazhi ye wajimbaikilwe. Nanchi wakonsha kumujimbaika. Bino nangwa byonkabyo ba kafunga baya na kupesha banabakazhi basapwishi, kwibabika mu sambu ya kipwilo byonkabya, kabiji Baibolo wikizhachisha kufuma ku Ntendekelo kufika ne ku Lumwekesho. Mwaamba

mba, “Kyawama, kijitu bulongo. Kijitu bulongo. Baji na... Bakonsha kusapwila pamotu byonka byo.” Nayuka mba akyo kijitu bulongo.

¹³⁶ Nobe muntu umo watatwile kwamba mujimi pa kimye kimo, Natwajijiletu na kusapwila, kabiji byo Nalupukile pangye. . .

Mwanamukazhi waambile ku mwaana wami, waambile mba, “Njina mbila ya kupana bufuku,” waambile mba, “inge bashobe baiya ku pulatifomu.”

Waambile mba, “Kyawama, Mrs., watazha muka?”

¹³⁷ Kabiji abwa bufuku byo kyafikile, byo Nanengezhenga kwita bantu kukitapisho, aye wabikile bulongo suki yanji kabiji wakoka sokoshi yanji nebintu byonse, winengezhe, watolokele pakachi ka kibamba kabiji watatula ne kutolauka, waamba mujimi ne kwaula. Natwajijiletu na kusapwila, ne kwita bantu ku kitapisho kulutwe. Inge Nabula kwikinemeka nangwa pacheche, nishi kechi kyajinga bulongo ne. Nanchi pano, kyawama, Baibolo yaamba mba kechi ku, amba, “Aye—aye Mupashi wa bangauzhi ukokela ngauzhi.” Lesa uji pa. . . Lesa ubena kwamba ku pulatifomu, lekai Aye ambe. Paulo waambile mba, “Inge kintu kimo kyasololwa ku umo, mukwabo azhindame poso mukwabo wapwisha.” Abyo ibyo.

¹³⁸ Pano, byo Nafikile pangye, abo bantu baambile mba, jibumba jikatampe ja bantu, baambile mba, “Obewa wafichisha pa muchima Mupashi Wazhila bufuku bunu.”

Naambile mba, “Kuuba ka? Kika kyo Nakonsha kuuba?”

¹³⁹ Waambile mba, “Kyawama, awa nyenga byo apaine aya mbila, aleluya,” baambile mba, “akya.”

“Kika,” Naambile mba, “Amiwa nasapwijilenga. Aye wajinga wafuma mundonda.”

¹⁴⁰ “Oo,” baambile mba, “akya kyajinga kipya kyafuma ku Jitanda. Akya kyajinga kintu kipya kyakila pa byo wasapwijilenga.” Uu!

¹⁴¹ Bino, akya kimweshatu. . . akya kimwasha nangwa kikye, kabiji Nekyamba na mushingi wenu, nangwa kubula buyuke, nangwa kubula munema, nangwa funjishisho ya bulubi yabula kuyuka bintu byavula pe Lesa kukila kalulu byo kayuka pa kwabilo ya mabebe amashika. Bino, akyo, Amiwa kechi naamba kyokyo kwikala ng’a—ng’ambilo yabula kufwainwa ne, mambo ino kechi ke mpuzha ya kwambilako bisela ne. Bino abo bo—abo bo bukine. Muntu wakonsha kuyuka mba Lesa kechi ye wakivundakanya ne. Aye ye wa mutende. Aye Baibolo kechi bamuyuka ne. Abo kyo bayukatu kuuba ke kutolokela peulu-ne-panshi, kwamba mujimi, amba, “Njina Mupashi Wazhila. Aleluya!”

¹⁴² Amiwa naimana ne kumona, mu Africa, bang’anga ne kwamba bintu, bavula faivi sauzande pa kimye kimotu;

kukilauka peulu-ne-panshi, mashi mu bilungi byabo, kasa bamba munjimi, kabiji ne kutoma mashi kufuma mu kiboyongolo kya muntu; ne kwita diabola, kabiji ne kwamba mujimi.

¹⁴³ Kabiji bino kwamba mujimi ke kya bupe kya kwa Lesa, bino akyo kechi kokulumbulula mba kya bukine kya Mupashi Wazhila ne. Lekai ne mubuule kyokyo pano. Naketekela mba bonse bashingwa bazhijikwa baamba na jimi. Naketekela muntu kimye kimo wikala washingwa bingi na Lesa kufika ne kukipimo kya kwamba na jimi. Naketekela kyokyo. Bino Amiwa kechi naketekela mba kyo kiyukilo kya kwamba mba uji na Mupashi Wazhila ne. Ee, mwane. Naketekela mba kuji bimye byo ekala na lwitabilo, muntu, mwakonsha kuya na kubika maboko pa mwanyike ao uji na kaasa, bino basapwishi fifite kasa bamulombelejile, kabiji wakonsha kubukwa mambo bainanji bajinga na lwitabilo lwa yewa mwaana. Lesa wikipana kwi aye, aye ke membala wa Mubiji wa Kilishitu. Ee, mwane. Naketekela kyokyo. Namona kyokyo kubiwa kabiji Nayuka mba kyakine. Bino kiji bibye, kubika kipwilo mu ndonda, kwikibika mundonda pakuuba mba kyakonsha kwingila.

¹⁴⁴ Pano twayai tupwishe yuwe veeleshi washalako kasa tukyangye kuya ne.

... *panyuma ya kwitabila, anweba mwabikilwe katetesho ka Mupashi wazhila wa mulaye.*

¹⁴⁵ “Katetesho!” Katetesho ko kaka? Katetesho ko kaka? Katetesho ke, kintu kitanshi kimwesa kuuba mba mwingilo wapwa, mwingilo wapwa. Kintu kyalondelapo kimweshatu mba kiji namwine. Kabiji kyalondelapo kimwesa bukikizhi, kwikilama.

¹⁴⁶ Kwaamba mba, nobe kyakumwenako, Amiwa naingilanga Kulonda ngyangi ku Pennsylvania, Amiwa naingilanga ne bataata kulonda ngyangi. Twalonganga bikochikala. Kabiji twakonsha kubikamo papo pa mukinyi wakulonga bipe, twabikamo bikopo, kabiji twabika bimo *papo* kabiji bimo *papo*, kabiji bimo peulu *papo* bi-bye. Bino kikochikala kasa kikyanye kibikwa katetesho, nshipikita wiya wapitamo, kabiji wabikapo, wasukenya *ku* kikyeye, wasukenya *ku* kyokya. “Aa! Wikikana! Byakonsha konauka byonse kasa bikyanye kufika ne. Wikikana! Wibilupulamo. Ubayi ne jikwabo.” Nshipikita wikikana kikochikala.

¹⁴⁷ Aye Mupashi Wazhila ye Nshipikita. Ukusukanyako pacheche, kabiji wasukena. “Bushe mwaketekela Kyambo kyonse kya Lesa nyi?”

“Amiwa kechi naketekela mba abya bintu bya Jizhina ja Yesu ne.”

“Wikikana. Ubena kusukena.”

“Amiwa kechi naketekela mu lubuko lwa Bulesa nangwa kintu kyamusango yeo ne.”

“Kibena kusukena. Bifumyaimo.”

“Bushe mwaketekela Yesu Kilishitu, kwikala umotu keesha...?”

“Kyawama, mujishinda jimo.”

“Ubena kusukena. Kifumyaimo, monai, kechi kinengezha ne.” Ee, mwane.

¹⁴⁸ Mulongo, inge kyafika kimye kya kwamba mba, “Amena!”

“Mwatambula Mupashi Wazhila nyi?”

“Amena!”

“Bintu byonse byapwijijika nyi?”

“Amena.” Pano nga Nshipikita uba ka? Bintu byonse byalongwa bulongo kabiji byakosa, mwayula Mamboawama. Oo, Kyambo kyonse kya Lesa kyawama. Byonse byalumbuluka. “Naketekela Kyambo kyonse. Amena! Amena! Amena!”

“Bushe mwaketekela mba Lesa ukibuka nyi?”

“Amena.”

“Bushe mwaketekela mba Yesu, ujitu pamo keesha ne myaka yonse?”

“Amena.”

“Bushe waketekela mba Mupashi Wazhila ujitu pamo byonka byo Ajinga nyi?”

“Amena.”

“Bushe waketekela mba Mupashi umo waponene pe Paulo, ye waponena pe atweba nyi?”

“Amena.”

“Bushe anweba Mwamuketekela mba ukyuba bintu bimo pe atweba, byo Aubile pe abo?”

“Amena.” Oo, oo, ubena kukwatakana pamo. Um-hum, kibena kukosa pano, twinengezha kushika kizhilo. Kijitu bulongo.

¹⁴⁹ Awa nshipikita ye ushika kibelo. Kika kyo oba? Aye ubikapo katetesho. Nanchi uyako kokwa wakakwata ku bibye bicheche byakumanyikilako, wafika popa pa kakitu kacheche wabikapo katetesho. Obewa kechi wakonsha kwikichiba ne. Inge akya, kikochikala, kibena kuya ku Boston, kechi kyakonsheka kuchibiwa ne. Kikala ke mambo abaya bingi kuchiba katetesho kanatu kyafika ku Boston. Kabiji muntu uji na luusa ye wakonsha kushikula katetesho, kabiji aye yenkatu kwapwa. Abyo ibyo. Ke kipe kyanokwa na kapanyi wanyangi wa *kananga-ne-kananga*. Ke katetesho kabo. Ke luketekelo lwabo amba awe kikochikala walongwa, awe kikochikala wanengezhiwa.

Kiji kulubaji lwabo. Abo kechi bakonsheshe kubika “B&O” pa “Pennsylvania ne.” Wafwainwa kubikwa katetesho, kabiji wabikwa katetesho.

¹⁵⁰ Kabiji inge Mwinakilishitu wabikwmo na Mamboawama, wayulwamo na buwame bwa Lesa, byonse bintu byawama bya Lesa biji mwi aye, na muchima washikuka, winengezha kwingila, waswa kwikjikwa pakifulo, ne kuuba kintu kyonse Mupashi Wazhila kyo akubuula kuba, wapitaila kufuma kulufu kuya ku Bumi, batokeshiwa ku bintu byonse bya muntanda, kwenda mu Kyeya monka Kyeya mo kinshila kwi aye, kasa abena kwenda, aye winengezha. Apo Lesa ushika kibelo kyantanda unuma yanji, kabiji wikishikila ne pamo byobya, kabiji umubika ne katetesho na Mupashi Wazhila wa mulaye. Aleluya! Bimye binga? Poso wafika ko abena kuya. Kechi mwakonsha kumufumisha pakanchi ka ngyangi ne ku mushikula amba mumone kana bintu byonse biji bulongo jibiji. Kijitu bulongo, anweba kilekaitu. Aye Shipikita wikipikita kala. Wabikwa katetesho bimye binga? Poso kufika ku juba ja bukuzhi bobo. Abo byo kuji kubikwa nkobe kwa katetesho.

¹⁵¹ “Kyawama, inge wafwa, nanchi, Mulongo Branham, pano inge obewa wafwa, obewa waamba mba ukijitu Nakyo?” Uji Nakyo myaka ne myaka. Kwepi kutatwila Bumi? Ponka pa kitapisho. Ponkapo wamona kivule pacheche. Akyo kyo kivule, Katetesho ka Mupashi Wazhila. Nanchi ke kivule kya bivule bya bivule, byonka byo Naambile juba jikwabo. Pakuuba umvwe wafwa, obewa utwajijilatu na upita momwa mu bivule poso wafika mu kinyazhi, kufuma ku kinyazhi ke kusulo icheche itupauka, kufuma kusulo ke ku kakola, kufuma ku kakola ke ku mukola, kufuma ku mukola ke ku kalunga ka meema, monai, ka butemwe bwakwa Lesa. Obewa wi muntutu umo.

¹⁵² Talai kuno. Saulo Mukote, mukote wabwelele munyuma, aye kechi wakonsheshe kufika kwi Lesa ne, nangwa byonkabyo kechi walubijilemo ne. Aye kine kechi byo ajinga ne. Aye wajinga ngauzhi, bino wajingatu pangye yakwa Lesa. Ao oene mambo, balongo, O naambijile mba, “Abewa kechi wa lubilamo ne.” Nanchi pano vulukai, aye wafumine mu kyaswa muchima wakwa Lesa, nanchi kintu kitanshi mwayukatu, aye—aye kechi waswile ne. Bino, kape inge kechi najikwamba kyokyo ne. Kijitu bulongo, Amiwa nsakutwajijila kwikala na kipwilo kya lusekelo bufuku buno. Nanchi pano, mwayukatu, kabiji kintu kitanshi mwayukatu, oo, ami, nanchi aye. . . Aye wayile ku—ku Yulimu Tumimu.

¹⁵³ Anweba mwayuka Yulimu Tumimu byo ajinga, wajinga kyakumvwala pa kyaji, empulo awa—awa wamvwalanga Alona. Kabiji kimye kyonse wajinga, Lesa kimye kyonse wajinga Lesa wakilapo ukumbula mu mashinda akilapo. Kabiji inge ngauzhi wa aula, abya byeya byaafyaamika byabula kufika pa Yulimu Tumimu ne, nishi uji mukilubo. Inge kaloota wabulang’ana

kiloto kabiji kyabula kumwesa kyeya pa Yulimu Tumimu ne, Amiwa kechi natako muchima nangwatu kyumvwanike byepi bulongo, kyajinga kyatama. Abyo ibyo.

¹⁵⁴ Kabiji Amiwa kechi nasakamana ne nangwa wikale na madigili a budokotala avula byepi kabiji ne bukata bwa kabungwe nkobe, inge waaula nangwa kusapwila, kyabula kwikala mwayila kikye Kyambo ne, obewa waya mungi, mulongo. Obewa uji. . . Awe ye Yulimu Tumimu wakwa Lesa. Inge waamba mba kechi watongwejilwe jimo kitendekesho kya ino ntanda kasa kikyanyye kwikalako ne, kechi kyakonsha kusama ne, mambo Baibolo waamba mba byo uji. Inge waamba mba wafwainwa kubatizhiwa mu jizhina ja “Taata, Mwaana, Mupashi Wazhila,” kyabula kusama ne, mambo kafwako nangwa umo mu Baibolo wabatizhiwe muyewa musango ne. Kanatu mu Jizhina ja Nkambo Yesu. Kuuba kyasama ne, nanchi pajipo kintu kimo kyatama pantu pamo.

¹⁵⁵ Nanchi Yulimu Tumimu kechi wapaine mukumbu kwi mukulumpe Saulo ne, kabiji kechi wajinga nangwa na kiloto ne. Aye wajinga kwalepa bingi kyakuuba mba kechi wajingapo ne na kiloto ne. Nanchi mwayuka kyo aubile nyi? Aye wayile ku ng’anga, kabiji awe ng’anga wakala, mukote diabola dokotala kokwa, dokotala ng’anga. Kabiji aye waambile mba, “Bushe obewa wakonsha kubuka nyi?”

¹⁵⁶ Aye waambile mba, “Ee, bino Saulo waambile mba wakonsha kwipaya yense ukabuka.”

¹⁵⁷ Aye waambile mba, “Amiwa nsakukukikizha,” aye wamvwajile nobe kalume. Aye waambile mba, “Mbukile ami undetele muntu wa kubafu awo wafwile kala.” Pano telekai ku kikye. “Ndeteleko mupashi wakwa Samwela ngauzhi.”

¹⁵⁸ Kabiji watwelele na—na kubuka. Kabiji, byo aubile byo byo, waponene kikuvumene, ne kwamba mba, “Namona balesa babena kwiya.” Monai, wajinga muntushi, “balesa,” babiji nangwa basatu, nobe Taata, Mwaana, Mupashi Wazhila, nangwa kintu kiji muyewa musango, mwayukatu. Aye waambile mba—aye waambile mba, “Namona balesa babena kwiya.”

¹⁵⁹ Waambile mba, “Mulondolole. Ubena kumweka byepi? Mwekelo yanji iji byepi?”

¹⁶⁰ Waambile mba, “Aye wanyana mubiji kabiji uji na mukangyo pa bipuzhi byanji.” Kechi wakingishe nangwa pachechetu ne.

¹⁶¹ Aye waambile mba, “Ye Samwela. Mulete mu kino kibamba, mulete kwi ami.”

¹⁶² Kabiji monai kimye Samwela kyo aishile kwi Saulo, waambile mba, “Kika kyo wangichila, byo waikala ke mulwanyani na Lesa?” Kabiji monai. Kechi wakijingatatu Samwela ne, watwajijiletu kwikala na mupashi wa bungauzhi. Kwaamba mba kyatama, lekai muntu yense ambe mba kyatama. Ke kya Bukine!

Aye wakijingatu ngauzhi. Mambo aye waambile, waawile ne kwaamba mba, “Nkondo keesha kechi ikekala ku lubaji lobe ne, kabiji obewa ne baana bobbe mukatapiwa mu nkondo keesha, kabiji pa kino kimye keesha bufuku ukekala pamo ne amiwa.” Abyo ibyo nyi? Aye wajingatu ngauzhi!

Pano mwaamba mba, “Oo, bino awa wajinga ng’anga waubile byobya.”

¹⁶³ Kijitu bulongo, Amiwa nsakwimubula Umo wabujile kwikala ng’anga. Yesu watolele Petelo, Yakoba, ne Yoano, kabiji bayile ku Mutumba Wakwalulwa kimye kimo, kabiji waimene peulu ya mutumba. Kabiji, Yesu, Lesa ubena kwikajika Mwaana Wanji; nobe byonka byo Mbena kweseka kikye... najinga nakyo bufuku bumo, kwikajikwa bu baana. Kabiji byo baubile byobyoy, bakeketele batana kuuba mba kwaimene Mosesa ne Elaija. Kasa babena kwisamba, kunshilang’ana. Kechi kwajinga mambandela atoka a acheche abena kupepela ne, nangwa makumbi atoka acheche, byonkabyo, abena kupepela ne. Bino bajinga bantu, kasa besamba. Mosesa wazhikilwe mu kilende kyabula kuyukanyikwa myaka eiti aduleendi. Kabiji Elaija waile Kumuzhi mu kalaki, myaka faivi aduleendi yapichilepo. Kabiji bonse babiji bajingapo, bajingatu na bumi nobe byonka byo bajinga bomi, baimene byobya na kwisamba Nanji kasa Akyangye kuya ku Kalvali. Aleluya! “Wabikwa katetesho posotu juba ja bukuzhi bwetu!”

¹⁶⁴ Nsakupelawizha, kabiji tusakupwisha kimye kyapwa, kabiji tusakulombelela bakolwa, pepi nobe mamineti faivi. veeleshi wabu 14, tangai, lekai tange kyabu 13 ne jikwabo, kyumvwai, kubwelatu panyuma.

*Mwi aye momwa... ketekejile, panyuma ya kumvwa
kyambo kya bukine, mamboawama a lupulukilo
lwenu...*

¹⁶⁵ Pano vulukai, ng’anyi lupulukilo lo baji nalo? Abo bajinga—abo bajinga Benakilishitu ba ku Efisesa. Abo, pano talai, mwamona bena Kolinda nyi? Aye kimye kyonse wibabulanga mba, “Inge Naiya mukachi kenu, umo uji na lujimi, umo uji na lujimi, umo uji na salamo, umo uji na bungauzhi, umo uji na...” Monai, aye kechi wibafunjishepo nangwa kintu kimo ne, mambo abo kimye kyonse bakebelenga *kikye, kyokya* nangwa *kikwabo*. Abo bantu bajinga na kintu kimo, bino kyajinga mu ndonda. Aye kechi wibafunjishepo bena Kolinda nangwa kintu kimo ne, kechi wikyubile ne, kipwilo kechi kyajinga mu ndonda pakuuba mba ekifunjishe ne. Bino, aye wakonsheshe kufunjisha babo bantu bine bintu.

*...alo, lolupulukilo lwenu: mwi aye ne anweba...
mo mwaketekejile, anweba mwabikilwe katetesho ka
Mupashi wazhila wa mulaye,*

Alo loluketekelo lwetu... (Oo, kechi toloke kikye ne)... loluketekelo lwa buswanyi bwetu ne kufika... kubukuzhi bwa lupoto bwa buswanyi bwetu, konka ku mitotelo ya lukumo lwanji.

Yii!

¹⁶⁶ Nga Mupashi Wazhila kyo kika? Pano, nanchi Nsakutanga byashala bukiji bukiji inge mwakonsha kungubilako lusa kufika papo. Twajinga kwepi bufuku bukwabo, Mulongo Mike? Anko bonse kobajinga na lusekelo, oo, bintu byonse byajingatu mutende, abwa bwajinga butemwe bwalumbuluka. Bino, kimye kyonse kyo wiya mu *yuwe* musango ufwenyako pacheche, ufwenya. Kimye kyonse kyo utapuka lutampulo, ufwenyako pepi. Inge kyafika panshi pantanda, wikala na kivule kya kivule kya kivule kya bivule. Pano, abyo kokuvula kwa Mupashi Wazhila uji mwi obewa. Abo bo butemwe. Bino, oo, umvwa kilaka kya kintu kimo.

¹⁶⁷ Oo, bushe kechi nobe bantu bakala ne, bantu bakala... Pano Nakonsha kutemwa kubwela kunyuma na kwikala myaka fiftiini jibiji, tweti! Oo, Nakonsha kupana kiji kyonse. Ing'anyi buwame bokyakonsha kuuba kwi amiwa? Nakonsha kwikala fiftiini nafwa bufuku buno. Kechi kyayukanyikwa ne. Pano ibyepi inge wajinga fiftiini bufuku buno, wakonsha kuyuka byepi kana bainobe basakwikala na bumi, kimye kya kufika ku muzhi, nangwa ine? Mwayuka byepi mba musakufika ku nzubo? Mwayuka mba mukekala na bumi keesha inge muji na myaka twelufu, bututulu bwa mubiji bwalumbuluka? Obewa wafwainwa kwipaiwa mu mapuso apa mukwakwa, wafwa, kiji kyonse kyafwainwa ku kumwekela. Kechi kyayukanyikwa ne, mwamona. Kechi pajipo kintu kimo kyayukanyikwa bulongo ne. Bino obewa ubena kukabila kyokyo. Kyo kika? Kiji popa Peulu Kibena kukulengela kukabila kikye.

¹⁶⁸ Pano, waya mu Kikye, nishi obewa uji na Bumi Bwape. Pano kyubiwa byepi? Ke “luketekelo.”

¹⁶⁹ Mali apanwako atanshi pa kintu kiji kyonse o aka? Inge Naiya kwi obewa na kupota motoka, Ng'amba mba, “Mali anga awe motoka?”

¹⁷⁰ Anweba mwaamba mba, “Awe motoka, Mulongo Branham, ubena kupotwa pa fili sauzande madolla.”

“Mali atanshi apanwako o aka?”

“Kyawama, Amiwa nkemupaye pa madola faivi aduleendi.”

¹⁷¹ “Kijitu bulongo, ao faivi aduleendi madola. Amiwa—Amiwa kaleta ashalapo kwi anweba kimye kikwabo, bukiji bukijitu inge Neamona. Anweba lamai motoka.” Nemupa madola faivi aduleendi, ao o malipilo atanshi. Abyo ibyo nyi?

¹⁷² Pano, lamai kyokyo, ke “luketekelo lwetu,” ke “lubaji lwa malipilo.”

...panyuma ya *kubikwa katetesho* na... *Mupashi wa mulaye*, aye... *Mupashi wa mulaye*,... panyuma ya *kubikwa katetesho*...

Ao ye...

Kika? Katetesho ka mulaye kokaka, ye Mupashi Wazhila walailwe?

Ye luketekelo lwa buswanyi bwetu poso...bukuzhi bwa buswanyi bwetu,...

173 Kyo kika? Ke lubaji lwa malipilo atanshi. Kabiji, mulongo, oo, oo, oo, oo, oo, basapwishi! Inge lulwe ke lubaji lwa malipilo atanshi, pano kikekala byepi inge atweba bonse twafika kokwa! Kikekala byepi? Inge ao o... Inge bibye byo tubena kwiyouwa pa kino kimye, twaikala balusekelo poso... Namona bantu baji na myaka naite baiya...

174 Namwene musapwishi umu wakala wayimene bufuku bumo. Aye walupukile, waambile mba... Nobe bibye, kasa abena kwiya ku pulatifomu. Kabiji Naambile mba, "Awa mwanamulume mukote usakusapwila ka?"

175 Aye waambile mba, "Kyawama, Nkambo apeshiwe." Mulongo wakala wachiluluka, wamvwala mukatampe walepa mukukumba.

176 Naambile mba, "Kika kyo bajikubujila kuleka basapwishi banyike basampwila? Awa mwanamulume mukote, wakonsha kusapwila byepi?"

177 Aye waambile mba, "Kyawama," waambile mba, "balongo," waambile mba, "leelo Nabaumvwenga balongo kasa basapwila juba jonse," waambile mba, "pa byaubile Yesu panontanda. Amiwa sakwamba byaubile Aye Mwiulu." Aye waambile mba, "Amiwa nasenda mutwe wami bufuku buno kufuma mu Yoba 7:27," waambile mba, "kunyuma kwine kokwa kintendekesho kya ino ntanda kasa kikyanye kwaalwa," waambile mba, "byo Aambile mba tubaangabanga twa kumakya byo twaimbile pamo ne baana bakwa Lesa byo babijikile na lusekelo." Watatwilatu byonka byo. Waambile mba, "Mwayuka kikye, papita kintu kimo kunyuma kokwa." Aye waambile mba, "Mwayuka..." Kabiji watatwile kuleta byamwekele Mwiulu. Aye wakiletele mu kakongolo ka mu kimye kya Kwiya kwa bubiji. Pa kyonka kya kimye, Mupashi Wazhila wamukwachile. Bino, ba mutangijiletu mulunda mukote kufuma kulutwe, aye wajinga na myaka naite-faivi. Aye wajingatu *bibye*, wajinga wakokomana, kabiji ne tusuki tuhechetu, mwayukatu, nobe *bibye*. Waimene byobya kabiji watatwile kusapwila, waambile, "Bintu byonse! Aleluya! Lukumo!" Watatwile kukilauka byobya. Waambile mba, "Oo, anweba kechi mujipo na mpuzha yabaya muno ya kusapwilapo ne." Kabiji wafuminepo, kuya panshi byobya, nangovu yonse. Kabiji alwa ke luketekelotu. Oo!

178 Pano nga Mupashi Wazhila uba byepi? Oo, apo ke pantu pawama, lekai tange veleeshi wabu 1 wa kyapitala kyalondelapo. Bushe Nakonsha nyi? Bushe kijitu bulongo nyi? Ambai mba, “Amena.” [Kipwilo kyaamba mba, “Amena!”—Waku.] Kijitu bulongo, veeleshi wabu 1 wa kyapitala kyabu 2, bukiji bukiji. Telekai:

Anweba, mwajinga . . . anweba . . . *Kabiji anweba wi musangulula, anweba mwajinga . . . mwajinga bafu mu mizhilulwila ne bubu:*

179 “Anweba Aye wimusangula.” Nga *kusangululwa* kyalumbulula ka? “Kwikala na bumi.” Pepitu kuya, bino Aye wimusangulula ku onka mali apanwako. Pano kikekala byepi umvwe anweba—umvwe anweba mwatambula sabo yenu yonse? Oo! Kechi kyakukumya ne Paulo, wakwachile mu jiulu ja busatu, waambile mba, “Jiso kechi jamona ne; kutwi kechi kwaumvwa ne; nangwa kechi kyakitwelapo ne, kutwela mu muchima wa muntu, Lesa byo ebatujila (mu butala) aba Bamutemwa.” Akya kikekala byepi! Inge mwaamba pa lusekelo lwakukakalwa kulondolola kabiji lwayulamo lukumo! Yii! Uum! Kala anweba mwajinga bafu mu bubu ne mu mizhilulwila imo Aye moetusangulwila pamo kupichila mu kivule kya kivule kya bivule. Pano kikekala byepi inge mwaiya ku kivule kya bivule kuya mu kivule, akya kivule kiya mu kakola, kakola kaya mu mukola, mukola mu kalunga?

180 Kabiji kikekala byepi inge mwaya momwa mu bukuzhi, na mubiji mupya, mwabwelatu ke nsongwalume ne jikwabo, nangwa mwanamukazhi wakyanyike, obewa kechi ukafwa jikwabo ne? Kabiji watala panshi pantanda, “Nakonsha kumvwa buwame magelepu kabiji ne meema awama atalala, bino, mwayukatu, Amiwa kechi mbena kwikikeba kuno ne. Bino juba jimo Yesu ukeya, kabiji ne yuwe mubiji wa bu malaika, awe wabulukumo Ye mbena kwikalamo mu . . .” Kechi ukeya kupichila mu munda ya mwanamukazhi ne, kechi ukeya mu masongola; bino mambo Aye wasemekejilwe kwakubula kilaka kya masongola, Amiwa kasangulwa kwakubula kikye, kabiji Aye ukamba juba jimo ne bafu ba mwi Kilishitu bakasanguka, kabiji ne yewa mubiji ye Naikelengamo ukasanguka ke mubiji wabu lukumo, kabiji Amiwa nkenda kabiji Nkamba, Amiwa nkekala na bumi kabiji Amiwa nkekala na lusekelo (aluluya), Amiwa nkekala mu mankulo a Peenape akeya kulutwe, kupichila mwi Yesu Kilishitu Nkambo yetu. Yii! Byobyoyo kiji, mulongo, ao o Mamboawama!

181 “Kabiji ne Amiwa,” Paulo ubena kubulang’anatu byo aji. Amiwa nsakutanga byashalako apa bino tulombelele bakolwa. “Kupembelele buswany, alwe lo luketekelo lwetu poso buswany, monka mwaila lutotelo lwa lukumo Lwanji.”

Oene mambo ne Amiwa, byo Naumvwa lwitabilo (Naumvwa mba anweba mwaketekela bibye bintu, Naumvwa mba anweba mwaketekela mu kutongwela jimo, Bumi bwa Peenape, ne lupulukilo, kabiji ne bikwabotu) mwi Nkambo Yesu, ne butemwe bwa bonse. . . bazhijikwa,

Kechi naleka kusanta na mambo a anweba ne, nemutela kimye kyonse mu milombelo yami;

Amba aye Lesa wa Nkambo yetu Yesu Kilishitu, Taata wa lukumo, emupe mupashi wa maana ne wa lumwekesho. . . maana a kumuyuka: Watwajijilatu na kwimweshwa Aye mwine kwi anweba kimye kyonse, na kufuma ku lusa ne kuya ku lusa, kufuma ku bulume ne kuya ku bulume, lukumo kuya ku lukumo. Kechi kubwela panyuma ne; kabiji, kana kufuma ku lukumo kuya ku lukumo, kutwajijilatu na kuya kulutwe. Amiwa katwajijilatu na kwimulombelela.

Jiso ja—meso enu a kukwatakanya. . .

182 Hum! Mwayukatu, mu Baibolo baamba mba anweba mwi bampofu kabiji ne kwikiyuka ne. Bino papo Paulo waambile mba, “Amiwa nsakulomba mba meso enu akukwatakanya. . .” Anweba mukwatakanya na muchima wenu. Abyo byo abena kwambapo. Mutala na jiso jenu, bino mumona na muchima wenu. Mwayuka kyokyo. Kijitu bulongo. “Amba Lesa wa Lukumo. . .” Twayai tumone, na—na veeleshi wabu 18.

Meso a milanguluko yenu alabe; pakuuba mba muyuke mwayila luketekelo lo emwichileko, kabiji ke bunoshi bwa. . . lukumo lwa buswanyi bwanji mu bazhijikwa,

Kabiji ne kuuba mba muyuke mwayila bukata bwa bulume bwanji bo etumweshwa-atweba. . . (yii! Baamba mba bulume bwapwa? Bulume bukyangye ne kufika ne). . . atweba twaitabila, mwaila kwingila kwa bulume bwanji bukatampe, (Anweba mwaketekela mu kwingila kwa ngovu ya bulume Bwanji, Nalomba mba Lesa usa kwitulwila bulume Bwanji pe anweba. Mwamona?)

Abo bo etupele mwi Kilishitu, byo amusangwile kufuma—kufuma mu lufu, ne kumwikazha ku kuboko kwanji kwa kilujo mu. . . mampuzha a mwiulu,

Kukila. . . makafulumende onse, . . . bulume bonse, . . . ngovu yonse, . . . bunkambo bonse, kabiji ne mazhina onse atelwa, . . .

183 Oo, oo, oo! Mambo—. . . Ine, Kyawama kubula kuuba. Twakonsha kine kusenda bufuku bonse pa kyokyo.

. . . mazhina onse atelwa, kechi pa yonka inontanda ne, kana ne muyoya ikeya:

184 Jo jika jonse—jizhina jonse jo jika? Jizhina ja muntu yense jikatelwa na Jizhina jaka? [Kipwilo kyaamba mba, “Yesu.”—Waku.] Jiulu jonse jatelwa mba Yesu. Akyo Kipwilo kyonse kyatelwa mba Yesu. Bintu byonse byatelwa mba Yesu, mambo Jo jonka Jizhina jimo Lesa jo aji najo. Aye utelwa mba Yehoba: Yehoba-yeumwena, Yehoba wanengezha Kitapisho; Yehobapha, aye Yehoba ye witubuka; Yehoba, aye Nkambo lushinjilo lwetu, Manasses; kabiji Yehoba, ba Yehoba bapusana. Aye watelwa mba Ntaanda wa Kumakya. Aye watelwa mba Taata, Aye watelwa mba Mwaana, Aye watelwa mba Mupashi Wazhila. Aye ye watelwa mba Alefwa, Aye watelwa mba Omega. Aye watelwa mba Ntendekelo, Aye watelwa mba Mpelo. Aye watelwa mba Musapi. Oo, Aye watelwa. . . Aye watelwatu bifulo byonse bya mazhina, bino Aye wajinga na Jizhina jimotu.

185 Abyo Mateo byo aambilengapo, Aye byo aambile mba, “Yainga panopantandaponse na kusambisha ba mukoka yonse, ne kwibabatizha mu Jizhina,” kechi mu mazhina ne, “mu Jizhina ja Taata, Mwaana, ne Mupashi Wazhila.” Taata kechi jizhina ne, Mwaana kechi jizhina ne, Mupashi Wazhila kechi jizhina ne. Ke kifulo kya ku Jizhina. Ke Mazhina amisabilo isatu ya kulubaji lwa Lesa umo. Jajinga ka Jizhina Janji? Aye Malaika waambile mba, “Obewa ukamutela Jizhina Janji. . .” [Kipwilo kyaamba mba, “Yesu.”—Waku.] “mambo Aye ukapulusha bantu Banji ku bubu bwabo.” Ao oene mambo kyo ba batizhile yewa musango mu Baibolo. Abyo Wazhila Augustine byo abatizhile Mfumu wa mu England, pepi nobe—pepi nobe aduleendi na fifite, myaka tuu aduleendi panyuma ya lufu lwa Kilishitu, mu Jizhina ja Yesu Kilishitu. Kijitu bulongo.

Kukila. . . makafulumende onse, . . . bulume bonse, . . . ngovu yonse, . . . bunkambo bonse, amba—amba mazhina onse atelwa, kechi mu yonka inontanda ne, kana ne muyoya ikeya:

Kabiji wabika bintu byonse munshi ya marulu anji, kabiji ba mupa kwikala mutwe wa kipwilo,

Ao ye mubiji wanji, . . .

186 Pano, inge mubiji wami uji na bulume bwa pa bintu byonse, nanchi abya biji mubiji wami byo Byonji. Abyo ibyo nyi? Abyo Byonji, abyo byo mwayuka mba byonji. Abyo ibyo nyi? Kyawama, nanchi, byonse Lesa byo ajinga, Aye waitulwijile monka mwi Yesu, mambo Aye wajinga kuyula konse kwa Bulesa mu mubiji. Abyo ibyo nyi? Kabiji byonse Yesu byo ajinga, Aye waitulwijile mu Kipwilo, “Abye bintu byo Nguba, ne anweba mu kebyuba byonse. Ne byakila pa bibye mukebyuba, mambo Ngya ku Bataata.”

Ao ye mubiji wanji, kuyula konse kwa aye uyuzha byonse mu byonse.

187 Oo, byo Natemwa kyokyo! Byo Natemwa kyokyo! Natangilenga juba jikwabo buuku wanembelwe pa lwendo lo Naile na kwingila—kwingila mu Africa. Kechi na mutangilepo kala ne. Baanga bamutangapo buuku, *Ngauzhi Wapepula Africa?* Amwa Natajilenga pa nsongwalume muचेचे mwina India. Baanga bamonapo kyokya kipikichala?

188 Naumvwine musapwishi umo, walombelela bakolwa pepi nobe myaka fifitiini nangwa kukilapo, aye waambile mba, “Amiwa kechi namonapo kyakukumya kubiwa mu bumi bwami ne.” Aye waambile mba, “Namonapo bantu bamba mba bakolwa mitwe, babukwa. Namonapo bantu baamba mba baji na munda-mukola, baikala bulongo, kabiji ne bikwabotu. Pakuuba kyakukumya, kintu kyalengwa kabiji kyalenga kintu kimo. . .”

189 Nalangulukile mba nanchi awa nsongwalume inge waimene popa kabiji ne kumona kyokya. Awa nsongwalume mwina India mukupa *wanji* wabaile bibye kuzhokoloka, kumo kulu. Kukwabo kwajinga kulu kututulu byonka bikala kulu kwa muntu. Kabiji inge mwamona, bukwasho bwanji, kwajinga sapato yalepa fotiini ichezi nangwa fifitiini kulepa, nobe bibye. Wajinga na kyela kya kapotwe panshi yakyo. Sapato yanji yaimene pa bibiji byaimana. Aye waendele kwiya konka Nkonaimene, bamuletele konkakwa. Aye wajinga na pakaswa pabiji. Aye watolele sapato yabaya ya kyela kya kapotwe wasupa panshi byobya. Nantajile pa kulu kwanji kwabaya, kwajinga pepi nobe *bibye* bukata kuzhokoloka.

190 Bino, aba bantu bena Mohammedi, Benamuhamedi. Bushe mwavuluka pa Mulungu wapwa byo Nemutangijile byanembelwe mu mapepala? Amiwa mwine njinakyo ponkapano, kufuma ku Africa, kyo batumina ku misonale wetu, Mulongo Stricker. Kuji sawakya wanembwa watundaikilwe ne Billy Graham. Kinetu. Balekejile Benamuhamedi kwibashijikila mukalunga. Lukatazho lweepi? Bamishonyi babena kusha mwingilo. Ing’anyi buwame bwakwikela kimye kyabaya? Abo bapumwatu.

191 Namutemwa Billy Graham, kabiji ndanguluka mba ke muntu wawama bingi wakwa Lesa. Bino Billy Graham kyo afwajilwe kumupa mambo, kwamba mba, “Pembelaiko mineti umo. . .” inge abo bamo beimena-pabuke ba Baptist bafwajilwe kumuleka wikyuba, Naketekela mba aye nge wikyubile. Naketekela Billy Graham ke muntu wakwa Lesa. Bino inge waambile mba, “Pembelako mineti umo! Amiwa ne wamwingilo wa Mamboawama. Anweba mwaketekela mu Lulayang’ano Lwakala, kabiji anweba mwamba mba Yesu kafwako kyo ajinga ne wajingatu muntu. Amiwa nabekya pa kukwe kuchocheka.” Amiwa kechi naketekela kubekya ne diabola ne, ine mwane, bino inge nabenkyele nanji, kabiji waambile mba, “Twayai anweba ne Amiwa twaiya pamo. Amiwa ne Dokotala wa Bulesa,” Billy Graham ke Dokotala wa Bulesa,

“lekai mbekye nenu pa kikye, kabiji ne kushinikisha kwi anweba mba Yesu wajinga Kilishitu. Pano, inge kyaiya ku lubuko lwa Bulesa, Amiwa kechi ngikala na byobya bya bupe ne, bino tuji na balongo bamo boba byobyo. Pano, inge mubena kukeba kwibaleta bantu kokwa, lekai ngitepo musango umo, Oral Roberts nangwa muntu mukwabo, muntu umo uji na mwingilo wabaya wakonsha kufika kokwa.” Iya kuno, kabiji mumone bibena kumweka, kwamba mba, “Bwinakilishitu kechi byobya byo mulanguluka ne.”

¹⁹² Pano bantu bonse baumvwa kulengeshiwa buvu mambo wafuminepotu wabwela wamusha. Mambo, bino, Amiwa kechi naketekela mwi diabola kubekya nenu ne. Amiwa nashipilapo mu kilungi kyanji byobya, kabiji ne kufumako kwi aye. Abyo ibyo. Bino umvwe kyafika pakifulo kya kuuba mba... Billy wafwajilwe—wafwajilwe kumumvwisha awa Mwinamuhamedi nobe kaluseku kaji *byobya*. Aye wafwajilwe kutola Baibolo ne kutola Isaya 9:6, ne kwaamba mba, “Ing’anyi ye a ambilengapo amba, ‘Kwi atweba kwi tusemenwa Mwaana, kwi atweba kwapewa Mwaana wamulume?’ Wajinga ng’anyi Muntu we? Wajinga ng’anyi Ye a ambilengapo? Wajinga ng’anyi we Ngauzhi? Wajinga ng’anyi we Mesiyasa wafwajilwe kwiya? Mbulai kwepi Aye ko elengele Ayemwine mwi Mohammedi. ‘Aye waashilwe na mambo amizhilulwila yetu, wafumpilwe na mambo abubi bwetu, lukabisho lwa mutende wetu lwajinga pe Aye, ku bipumo Byanji ko twabukilwe.’ Kimweshai mwi Muhammedi. Aye wajijile Byepi, ‘Lesi Wami, Lesi Wami, kika Anweba kyo mwandekela Amiwa? Abo baanshile maboko Ami ne maulu Ami,’ ne bikwabotu? Mweshe na kyambo kyobe, ng’ambilo yobe obewa mwine.” Kika, aye inge wapumine yewa Mwinamuhamedi kyatama bingi inge kechi wayukile ne ko aji ne. Akyo ikyo.

¹⁹³ Pakuuba kipepala byo kyabwelele, kyo kyakozhezhe michima, kyalengejile muchima wami kukiluka. Byo kyaambilwe popa, “Nangwa Billy wajinga na kyakushakaminako, Mwinamuhamedi wakonsha byepi kwamba mba kyatama,” waambile mba, “kimye Rev. William Branham ku Durban, South Africa, kwajinga byakukumya byakubula ne kupachika ne, bulume bwa Bulesa, kimye teni sauzande Benamuhamedi po baponejile panshi kikuvumene ne kupana bumi bwabo kwi Yesu Kilishitu.” Kyakine. Abo bayuka pa kikye. Bayuka bishina bebiyuka abye. Kechi mwakonsha kumbula ne.

¹⁹⁴ Kimye kimo kwajinga umo waishile kwi Yesu, waambile mba, “Labbi!” Mwayuka wajinga mu Faliseo. Waambile mba, “Twayuka mba Anweba mwi Mufunjishi wafuma kwi Lesi. Atweba twikiyuka. Twikiyuka, mambo kafwako muntu wakonsha kuuba bintu byo Uba ne kanatu Lesi uji nanji. Twayuka. Twikiyuka. Pakuuba kechi twakonsha kwikitabatu

ne, monai, mambo inge twakonsha kuuba, kyawama, tukapangwa mu kipwilo kyetu. Monai, tukataya munema wetu.” Kabiji Yesu waambile mba, watatwile kumubuula mba wafwainwa kusemwa jibiji.

¹⁹⁵ Pe yewa nsongwalume Mwinamammedi, byo aimene popa, pokiji kipikichala. Kamela kechi wakonsha kusenda kyabubela ne. Awa waimana popa, mukupa umo wajinga waipipa (pepi nobe fotiini ichezi) kukila mukwabo, waimene popa na sapato ya kyela. Naambile kwi aye, Naamba, “Obewa wamba Kizungu?”

¹⁹⁶ “Ine, mwane.” Kechi wakonsheshe kwamba Kizungu ne. Ututulula waambile mba, “Aye kechi wamba Kizungu ne.”

“Waikala myaka inga mu yewo musango?” Wakututulula wa mwipwizhe.

“Kufumatu ku kusemwa.”

“Wakonsha kwendesha kulu nangwa pacheche?”

“Ine, mwane.”

“Bushe waketekela mwi Yesu Kilishitu nyi?”

Waambile mba, “Amiwa ne Mwinamohammedi.”

Naambile mba, “Wakonsha ku mwitaba Yesu Kilishitu inge Aye usa ku kukosesha nyi?”

¹⁹⁷ “Amiwa nsa kumwitaba Yesu Kilishitu kwikala Mupulushi wami inge Aye wakosesha bulongo.”

¹⁹⁸ “Inge Aye usakukosesha kokwa bulongo, awa mukupa ekale nobe mukwabo, usa kumwitabila Aye nyi?”

“Amiwa nakonsha.”

¹⁹⁹ “Kyawama, Lesa, kika Kyo musakuba?” Akye kyo kintu kyalondelapo; mepuzho onse a kumbulwa. Mulongo Mike, aya yo ng’umvwinno. Napembelejileko mineti umo pakuuba mba mone Aye byo akonsha kwamba. Natajile byobya kabiji namwene nsongwalume ubena kuya, na kwenda, nobe ku lubaji lwa kibumba. Naambile mba, “Baanga ba mwianweba Benamohammedi bakonsha kwitabila? Awe ke nsongwalume Wakimohammedi, mumonai, imana popa.” Naambile mba, “Anweba badokotala, mubena kukeba ku mumona nyi? Awa waimana.” Oo, mwayuka po muji. Monai, mwayuka po mwaimana. Kafwako nangwa umo . . . Awa uji popa.

²⁰⁰ Naambile mba, “Enda kuya kukwe, mwanami.” Kabiji bamumwene, awa wiya. (“Ta-lampu, ta-lampu.”) Naambile mba, “Kyamweka nobe uji pepi twelufu ichezi bwipi. Pepi nobe *byobya*.”

“Ee.”

²⁰¹ Naambile mba, “Bino Yesu Kilishitu Mwaana Lesa wakonsha kumulenga kwikala bulongo. Mwakonsha anweba Benamohammedi ku mwitabila Aye kwikala Mupulushi wenu?”

202 Kuji masauzande a maboko afita asutwilwe peulu byobya. “Kyawama, Nkambo, pano kino kyo kimye.” Naambile mba, “Taata Wamwiulu, inge Anweba mwakumbulapo kala nkumbulai ponkapano, akye ke ku Lukumo Lwenu, akye ke kya Anweba. Nalomba mba Anweba musakukosesha yuwe nsongwalume.” Amiwa na mulombejiletu byobya.

203 Naambile mba, “Mvulako sapato yobe.” Aye watajile na tuseko, wakututulula. Naambile mba, “Mvulako sapato yobe.” Aye wakasulwile. Mambo Namwene kyokya kimwesho, mo kisa kumwekela. Aye wavujile kyokya kintu. Byo ekibwezhezhe kunyuma ne kwenda kwiya nkoji, mikupa yonse ibiji yajingatu bulongo, yonse ibiji ya endelengatu nobe yakatataka. Naambile mba, “Ubeni kukeba kwendauka kulutwe ne kunyuma nyi?”

204 Aye watatwile kujila byobya, kubwela lunyuma ne kulutwe, aye kechi wayukile kyakuba ne. Kwenda byobya, waambile mba, “Anweba Allah! Allah!”

Naambile mba, “Yesu! Yesu!”

Oo, oo, oo! “Anweba Yesu! Yesu,” nanchi. “Yesu! Yesu,” muyewa musango.

Naambile mba, “Bushe kujiko mepuzho, kujipo mepuzho nyi?”

205 Julius Standsklev, baanga bamuyuka? Mulongo Standsklev waiyapo kuno ku kipwilo; wa—wailetu ku Germany. Waambile mba, “Paka mineti kamotu, Mulongo Branham, mineti umotu.” Pakuuba mba tulate ukopa mapikichala bukiji bukiji. “Bushe Nakonsha kukopa kipikichala kyanji nyi?”

Naambile mba, “Yikwashe obewa mwine.”

206 “Enda kwiya *kuno*, imika sapato yobe *papo*.” Aye waimene byobya, wakopele kipikichala kya nsongwalume, na mikupa yonse ibiji ijitu bulongo mo yafwainwa kwikela. Apa paimene sapato yanji yakala ne sipilinga, byo *bya*, byo *bya*.

207 Naambile mba, “Baanga ba mwianweba Benamuhamedi mwakana Mohammedi kwikala ngauzhi, kabiji ne kwitabila Yesu amba ye Mwaana wakwa Lesa, kabiji ne kumutambula Aye kwikala Mupulushi wenu?” Maboko teni sauzande asutwilwe mwiulu. Aleluya! Abo kechi bakeba. . .

208 Abo beseka kwikikanya, mambo atweba “tubatu kyongo kyazhila,” byo betutela, mwamona. Kijitu pamo, Lesa ubena kwenda. Aye ubena kwikajika Kipwilo Kyanji. Aye ubena kuuba byakilapo, bya vula byakila pa byonse byo twakonsha kuuba nangwa kulanguluka. Aye ujitu pamo Lesa bufuku buno byonka byo Ajinga kala.

209 Nanchi, balunda babacheche, lekai ne mubuleko kintu kimo ponkapano. Batemwe bami bantu bawama, anweba muji mu inontanda, ne anweba muji mu mantanda a matepu ao bakekala kubushiya bwa tulunga kabiji ne konse komuji, kechi mwikale

na moyo ne. Byonse bijitu bulongo. Taata Lesa, kitendekesho kya ino ntanda kasa kikyangye kwaanwa, wayukile bintu byonse bikamweka. Bintu byonse bingilatu monka mundonda. Anweba mwamutemwa Aye nyi? Lamai muchima wenu bulongo.

²¹⁰ Kabiji, mvulukai, inge awe mwela wafumamo mu bubwe bumi, kwini anweba bantu bakala nangwa kwi anweba banyike, ne anweba bamaama, inge mwamona tubana twenu tucheche, aka kamwana kanakakazhi kafwile byo kajinga na moba eiti nangwa moba faivi, ukekala mwanamukazhi mwanyike walamba inge mwamumona. Awa nkambo wamulume wazebukile mapuzhi, wakakelwe kumona ko abena kuya; inge mwamumona, nkambo wamukazhi, ukekala mwanamulume mwanyike walamba, ke mwanyike myaka pepi nobe tweti, ukijitu mu buya bwa bakitwala. Kabiji ukekala byonkabya myaka ne myaka. Mwakonsha kukwata kuboko kwanji, mwakonsha kwiyimuna maboko ne aye. Anweba mwakonsha kumukumbata, bino kechi wakonsha kwikala “nayoya ng’umvino ne,” aye ukekala ke “mulongo.” Oo, ami! Aye ukekala wa waina bingi kukila kwikala wa “masongola.” Anweba mulanguluka mba mwamutemenwe? Kine byo mwaubile. Bino abwa bwajinga *phileo*; pembelelai mwaikala na *agapao*. Pembelelai poso abwa butemwe bwa Bulesa bwakukwata, kabiji pano mukamona byokiji. Abwe kuno bujitu no kishala kya biswaswa kyakala, kechi kyawama ne, kafwako kijiko ne. Kintutu kyo Nemukwasha kya kuuba ponkapano, ke kikyey, ami—ami—ami balunda . . .

²¹¹ Palutwe kacheche Amiwa nkoba . . . Mwakonsha kutemwa kimye kimo amiwa natola aa makyapitala akwabo abiji? Aye Nkambo . . . Na—Nafwainwa kukokolokatu pacheche kuya ku Chautautauqua kasa kikyangye kufika ne. Bino, Amiwa kuuba nasapwila bibye bintu mu kokwa kupwila ne. Muji bavula bingi babu- . . . baji na luketekelo lwavula bingi. Anweba mwamona? Akye ke kipwilotu bunke. Mwamona? Amiwa kechi nakonsha . . . Njinasambu ya kusapwila muno kyonse kyo Mbena kukeba kuuba. Ino ke tabbanako yami, monai, kabiji Mbena kwimubuula. Bino, Naketekela mba aba bantu bapuluka. Ee, mwane, Nekiketela bingi. Bino, oo, pano ibyepi kwenda kasa wayuka po ubena kwendela. Kiji byepi, kuyukatu, kuyukatu kyo ubena kuuba, mwamona, mukifulo kya kuteleteta, ne kwitetula mu lwendo. Twayai twimane mu Kyeya, kabiji ne kwenda mu Kyeya ne kuyuka jishinda jo ubena kuyamo. Akyo kine. Aye Nkambo ekale ne anweba.

²¹² Kabiji inge yense uji muno pakino kimye kechi waikajikwa mu kifulo kyanji ne! Obewa kechi wakonsha kwikala kyatutu ne wafwainwa kwikala muka muntu. Kyawama, mwaamba mba, “Mulongo Branham, Amiwa kechi naubapo kintu mu bumi bwami ne. Amiwa kechi ne musapwishi ne.” Kyawama, kapepo Lesa wakuletele kuno pakuuba mba wikale na kisemi

kya baana, kufuma mu kyokya kisemi kya baana mwafwainwa kufuma kisemi kikwabo kya baana ao ukekala ke musapwishi ukatuma myeo mamilyoni kwi Kilishitu. Obewa wafwainwa kwikala muno. Anweba muji muno na mambo akintu kimo. Bushe mwayuka kyokyo nyi?

²¹³ Kyawama, mwaamba mba, “Byonse byo Naubapo, byajingatu, jishimikila ja bantu bakala. Kabiji Nasendanga, pa kimye kya mabaanga, kechi nayukile mwakulamina baana bami ne. Amiwa natajile pa balongo babacheche bakamulanda babula ne sapato. Naikalanga ne kujila. Amiwa najinga na kikochikala kyakala, kabiji ami ne Maw twayile ku kipwilo.” Kechi usakamane ne, mulongo. Obewa utwajijiletu kumutemwa Aye, Aye uji na mwingilo obe. Obewa wafwainwatu kwikala mujishinda jo waikelamo, uyengatu kulutwe. Mwamona? Obewa kechi wakonsha kusapwilapo byambo ne, pakuuba obewa wafwainwa kwikala nkambo-ya mwana mukanobe wakonsha kwikyuuba.

²¹⁴ Bushe mwayuka mba Lesa watakaikile (Twayai tumone pano, jizhina janji jajinga ng’anyi?) Levi, wapaine bya bujikumi kimye kyo ajinga mu kifuka kyakwa Abulahama, kimye Milekezendeke kyo amukumenye? Baanga bayuka kyokyo? Kabiji twayai tumone. Abulahama wasemene Izaka, Izaka wasemene Yakoba, Yakoba wasemene Levi; ao wajinga shanji, nkambo yanji, nkambo-yaba nkambo yanji; kimye kyo ajinga mu kifuka, mu lukunwa wa bankambo yanji-yaba nkambo yanji, Baibolo wamutakaika pa kupana bya bujikumi kwi Milekezeke. Ami, ami, ami, ami, Mulongo! Oo! Amiwa. . .

²¹⁵ Kuji ka kacheche—kuji mucheche mu English waalulukile bufuku bumo ku England, aye waambile mba, “Amiwa njibingi na lusekelo! Amiwa njibingi na lusekelo!”

²¹⁶ Ee, njibingi na lusekelo pa kuyuka mba akye kyakine! Kabiji juba jimo ja lukumo, Amiwa kechi nayuka aja juba ne, bino umvwe akyo kyajinga kimwesho, Amiwa kechi naamba mba Najinga konka ne. Vulukai, kimye kyonse lama kiky mu milanguluko, lekai ne ba matepu bobile mu jishinda jimotu. Nangwatu Najinga mu kimwesho, nangwa nasendelwe mu Mupashi, Amiwa kechi nayuka ne. Bino kyajingatu nobe byonka byo Nakwata Mulongo Neville *byobya*, kyajingatu kitutulu. Kabiji Nakonsheshe kutala ne kwamba na boba bantu. Kabiji mukazhi wami mutanshi waimene byobya, kechi waambile mba “balume bami ne,” waambile mba, “mutemwe wami mulongo.”

Kwaimene nsongwakazhi ye Naendanga nanji myaka yapita kunyuma.

²¹⁷ Kapepo bantu banji bamo baji muno, Alice Lewis kufuma ku Utica, wawaina bingi, wipana nsongwakazhi Mwinakilishitu. Wasongwelwe kumpelo ya bumi bwanji, kabiji wajinga na mwanaji mutanshi kabiji wafwile pakusema.

Alece Lewis, Nafikile ne pa nzubo ya majila na kumumona. Nafikiletu pa nzubo, Naumvwine mba wafwa. Naendele kuyako kokwa, kechi kwajingapo muntu nangwa umo mu luumu ne, Naambile mba, “Bushe kujipo mwanamukazhi kuno, Mrs. . . .” Jizhina janji jajinga ke Emmerke. Kabiji aye wasongwelwe ku wawama nsongwalume Mwinakilishitu, kabiji wajinga nsongwakazhi wawama Mwinakilishitu. Amiwa najinga na yewa nsongwakazhi konse konse, misango yonse ya mampuzha kabiji ne bintu byonse. Kabiji twajingatu banyike, eitiini, myaka naitiini, konse konse, wawama Mwinakilishitu, kechi nayukilepo nangwa kimo pe aye ne kanatu Bwinakilishitu wakishika. Kabiji Najinga ndengamambo. Bino Nayanga nanji. Nayile mukachi mu. . . Kabiji mulume wanji wajinga wasemwa-jibiji Mwinakilishitu, muntu wakine. Kabiji Amiwa kechi nayukile ne; Nayukile mba wafwa, Namwene mu pepala. Kabiji Naile konka ne nkumbuula. Naile kokwa kwi Coots kabiji Naambile mba, “Muji na Mrs. Emmerke?”

Aye waambile mba, “Billy, uji monka mu kibamba kokwa.”

218 Natwelele mukachi ne kwimana ku lubaji lwa mbokoshi. Nalangulukile, “Alice, Napitapo mumayengo mwafita, Napitapo mu mikwakwa ya mfishi. Obewa ne amiwa twaendele pamo mu mikwakwa kabiji ne kwabuka mukola, kimye kyo baikalanga na mabwato akutambisha, twaikalanga kokwa na kuteleka byo baimbanga kyombesha kya mizhinge. Kuku ne kuku mu mikwakwa, wajinga inetu wawaina! Namusachila bingi Lesa Amiwa pa bumi bobbe. Kokoloka, nyenga mutemwe wami, kokoloka mu mutende wa Lesa.”

219 Kabiji bufuku bukwapo mu kimwesho, waishilenga na kunyemena kwi amiwa. Waambile mba, “Mulongo wami wapeshiwa,” ne kukumbata maboko anji. Oo, oo, mulongo ne nyenga, kyangalulwile bingi. Amiwa kechi nakonsha kutwajijila kwikalala musango umo ne. Kya kine bingi! Kijitu pamo nobe—kijitu pamo nobe Mbena kutala pe obewa, abwa bukine. Nanchi, kechi kujipo moyo ne. Nakonsha kufwa kasa bukyangye kukya ne.

220 Nasaka kukomesha nsongwalume wami mucheche kunyuma kokwa, Yosefwa. Nasaka kumumona mu pulupiti, byo Nakonsha kutala yuwe Baibolo. . . inge Nafika pantu pamo Namona Yosefwa mu pulupiti na kusapwila nobe—nobe mwanamulume mwanyike wayulwa na Mupashi Wazhila, washingwa na Mupashi wakwa Lesa. Kabiji Naketekela mba ukekala ngauzhi. Juba jo Na—kimye kyo Na—byo Namumwene myaka sikisi kasa akyangye kusemwa, anweba mwavuluka byo ne mubujilenga mba ubena kwiya. Vulukai byo Namutelele, konka ku lubaji lwa kitapisho, kwakubula kuyuka kyo Mbena kwamba ne, na kupesha baana, Naambile mba, “Joseph, obewa wingauzhi.”

221 Kabiji juba jimo kasa naimana mu lubaza, aye waishile kwi amiwa, kabiji waambile mba, “Taata, bushe Yesu uji na kuboko nobe kwenu?”

Kabiji Naambile mba, “Kyawama, ee, mwaana. Kika?”

222 Aye waambile mba, “Amiwa najikwikala pa kinga yami, na kupembelela Sarah” ao ye nyenga yanji mucheche, “kubwela kufuma ku sukuulu.” Kasa aikala byobya. Amiwa kechi na muswisha kulupuka kuya mu mukwakwa ne, waikele panyuma *bibye*. Kabiji waambile mba, “Nakekelele peulu, kabiji,” waambile mba, “byo Naubile, kwajinga kuboko nobe kwenu, na jilaya jatoka jakwachile.” Kabiji waambile mba, “Kwaile mwiulu.” Waambile mba, “Bushe akwa kwajinga kuboko kwa Yesu kwailenga peulu?” Nantajile pe bainanji, bainanji bantajile. Twaile ku ba Mrs. Wood. Konse ko baji, baikala muno. Twamwipwizhe kuyamo-ne kubwelamo, kulutwe ne kubwelamo, ne monse motwafwainwa kubila. Kyajinga kimwesho. Aye wikimwene. Inge Nakonsha kumona kimye kyakwa Joseph mucheche kasa aimana. . . Naketekela nakonsha kwikala Na bumi ne ku mumona byo asongola, inge Yesu wabula kwiya bukiji.

223 Kabiji Amiwa ne mwanamulume mukote, uji na myevu yamvwi mu shingo. Natuma. . . Nakeba kutuma tuu nangwa fili milyoni myeo kwi Kilishitu inge Nakonsha kwikyuba. Ke lupata lwami lwa kusapwila Mamboawama kufika ku makoka onse apantanda. Ee, mwane. Nanchi, kwashai, Lesa, Amiwa ke kyube. Nanchi, inge Nakonsha kumona kyokya kimye kyafika, Mulongo Mike.

224 Nakonsha kutala pa kimye Maama, Meda, Namutela mba, mutemwe wami, monai, uji na. . . tubena kukota, ne kumona suki yanji kwaluka yavwi, kabiji ne kumona atweba mba tubena kufumapo, na kupita.

225 Libeka, Amiwa nasanta bingi pe Rebekah. Bafunjishi baji banyimbo bambujile bufuku bukwabo, baambile mba, “Ami, inge watwajijila kyokya, Mulongo Branham,” amba, “kyakosa kubuulang’ana kyo akooba.” Monai, ubena kuya kulutwe mu bunyimbi. Namukeba, kabiji Nakeba. . . Amiwa nakeba Sarah pa kijimba, Becky wimba piyano, Nakeba Joseph mu pulupiti.

226 Inge Nakonsha kumona mba kyamweka, kabiji amiwa ne Bamaama twakonsha kutalatata na kutwela, amiwa pa mukombo wakala, bufuku bumo, twaiya mu mukwakwa, kabiji Nakonsha kutala kokwa ne kumona nsongwalume wami kasa aimana byobya bashingwa na Mupashi Wazhila, na kusapwila awo Mamboawama amotu. Nasaka kutola yuwe Buuku wakala, ne kwamba mba, “Mwaanami, akye Kiji bibye, Ke obe. Obewa imana Naji, kechi mwafwainwa kunekenyo Kyambo kimo ne. Obewa wafwainwa kwikala Nankyo, mutemwe. Kechi ibyo, kechi wasakamana ne, Amiwa kechi natako muchima na yewa

wakukwimena ne, awo wakwimena, Lesa ukekala ku lubaji lobe. Obewa ukasapwile Kyambo kyonse monka mo Kyanembelwa Momwa, kabiji Bataata bakakumona kubushiya bwa mukola.” Nakonsha kutemwa kubwela kwipi ne kumusenda mu maboko ami, mukazhi wami, ne kwabuka bushiya bwa Yondano.

²²⁷ Poso akya kimye, Lesa, lekai ngikale mu mwingilo, walukokelo! Lekai ami! Amiwa kechi natako muchima ku kyakonsha kufumamo ne, nangwa binga, byo Nguba, nangwa *kikye*, *kyokya* nangwa *kikwabo*. Lekai ngikale wakishika kabiji wakine ku Kyambo kya Lesa mumi, kya kuuba mba aja juba jafika kabiji naabuka kokwa, kabiji Nakonsha kutala kubushiya ne kwamba mba, “Byo uji. Oo, mulunda nami wawama, mulongo wami wawama, nyenga yami wawama.”

²²⁸ Musapwishi mwanjike, yanga mu mwingilo, ikala ku kikokoji. Anweba bonse basapwishi banyike ne bintu bikwabo, kechi mwaikalatu ne. Kechi mwafainwa kwikalatu ne kumona kyo mubena kuba ne. Yainga konse na kuleta mweo. Ubaipo kintu imo! Yangatu kulutwe, ikala wakwenda. Kechi wakonsha kwimana ne, musapwishi wakyanyike popa. Lesa apeshe muchima obe.

²²⁹ Wavululako kimye kyo Najinga pa kyokya kimino, Nalanguluka, kabiji kapepo kukilapo bwanyike. Najinga pepi nobe myaka tweti ne banapo kimye kyo Nabikile jibwe ja kintendekesho popa. Navuluka Namvwalanga kochi wambulu ne tolosi utoka, kabiji naimene popa nekubika jibwe ja kintendekesho pa myaka saate-wanu yapitapo. Monai myaka yo Najinga nayo, Najingatu nsongwalume. Naimene popa, na kubika jibwe ja kintendekesho. Amiwa kechi na nekenyapo Kyambo kimo ne. Amiwa ne Kilama byonka byo Nabikile joja jibwe ja kintendekesho. Amwa mo muji lushimuno lwami, mo Nanembele pa kipepala kya Baibolo, kabiji ne kitabwilepo ne kwikibika pa jibwe ja kintendekesho, kabiji kikijitu ponka. Kabiji kinembwe pa mapepala a Kyambo kya Lesa kya Peenape Mwiulu. Lekai ngimane wakishika kufika ne kupelo.

Twayai tukunyike mitwe yetu pa kamineti tulombe.

²³⁰ Pa kupezhako bufuku buno, kushika kwabibye, kyapitala kimo, akyo kyabula kubingishiwa. Mwafwainwa kwikala na mukwabo, kabiji utangilapo kuya kulutwe ne kubika Kipwilo mu kifulo Kyakyo. Amiwa ke kileta kwi anweba kimye kimo, Lesa inge waswa. Nafwainwa kukokolokapo kakimye kacheche kasa kyangye kuya ku Chautauqua kokwa, ku mbng’eno ikwabo yabaya, nanchi Kabuka kufuma kokwa kuya ku Oklahoma, kufuma kokwa ke kuya ku Klamath Falls, nanchi kufuma ku Klamath Falls ke kuya ku California, kufikatu ne ku Yakima, Amiwa kechi nkabwela ne poso kufikatu ne pa 15 Kasalakanduba.

²³¹ Bino talai, lekai ne mwipuzheko kintu kimo, inge kintu kimo kyamweka kwi obewa nangwa Amiwa akya kimye kasa kikyangye kubiwa nangwa kyokya kimye kasa kikyangye kufika ne, inge Nakonsha kupita mu mukola kuya mu Ntanda, nangwa inge wakonsha kupita mu kyokya kimye ne kuya mu yoya Ntanda, bushe mubena kumvwa luketekelo bufuku buno amba tukakumana kokwa mu kyokya Kifulo nyi? Inge wauba, sutulaiko kuboko kwenu, ne kwamba mba, “Amiwa naumvwa luketekelo mu muchima wami.” Lesa apeshe muchima wenu. Lesa emupeshe. Inge mujipo umo muno wabula kumvwa luketekelo amba bakatanwako, kabiji bakonsha kwamba mba, “Mvulukai amiwa, Mulongo Branham, mba Amiwa ngikale na luketekelo,” sutulaiko kuboko kwenu, “Nakeba kwikala konka, ne amiwa.” Lesa akupeshe, inetu. Lesa akupeshe.

²³² Taata Wetu Wamwiulu, twaleta kwi Anweba bufuku buno kino kipwilo, kuboko konse, nobe byonka byo Nayuka, kwakusutulwa, bonse bino muntu umo, mweo umo wawama waikala kunyuma kukwe, bakokatu pacheche kana bakonsha kwabuka kuya muyoya Ntanda, amo mwavula bwine bwine butemwe bwa Bulesa mu michima yabo, mu muchima wa mwanamukazhi wawama, ao wakonsha kwiya ku yoya Ntanda inge wakonsha kufwa bufuku buno, wakonsha kundosa mweo wani wakonka kuya mu Ntanda Yamulaye yakwa Lesa?

²³³ Taata wa Mwiulu, byonka byo Naimana muno mu pulupiti ne kusapwila, kabiji kusulwila ne kujila, kabiji ne kulomba, ne ku kusashijila, lekai ne mwipuzhe Anweba japelako, Nkambo, lekai ngipuzhe nyenga yami kokwa kunyuma; Lesa, bikaimo mu muchima wanyi, bufuku buno, abwa butemwe bwa Bulesa, awa Mupashi Wazhila wakwa Lesa, awa mutende wakila mukukwatakanya byonse, amba aye atambule Mupashi Wenu, abikwepo katetesho ka Mupashi Wazhila poso joja juba. Nakeba kumumona, Nkambo, kimye kyo tukabuka kyabu. Inge kya—inge kyami—inge jishuko jami jakwabuka, inge akya kyo mwaamwesheshe Amiwa kyaikala kyakine, kabiji Naabuka kubushiya kokwa, Nakeba kumukumnya kokwa, nkamumone kunyena ne kukwata kuboko kwami, ne kwamba mba, “Mulongo wami wawama, kyajinga abwa bufuku Kintu kimo kyambujile mba sutula kuboko kobe, byo ukapwisha kusapwila pa Buuku wa Efisesa. Nasutwile kuboko kwami, kabiji kintu kimo kyamwekele kwi amiwa panyuma ya kyokya. Amiwa bano. Amiwa ne mwanyike pano myaka ne myaka.” Lesa kiswishai ku mutemwe wawama.

²³⁴ Abo basutula maboko abo amba babikwa katetesho ka Mupashi Wazhila, aye Mupashi wakwa Lesa uji pe abo, kabiji batambula Mupashi Wazhila, babikwa katetesho na butemwe bwa bulesu mu michima yabo. Byo twisanchila Anweba pa babo.

²³⁵ Pakuvuluka, Taata, amba amwa muntanda mukaya ao matepu. Byavula byakufyatula mawi biji kuno ku pulupiti, akyo

kyalumbulula mba matepu abena kulengwa, ne kubwezhiwa kokwa, Jiwi jikayanga mwapusanapusana mwaya ntanda yonse, kuzhokoloka ntanda, tweti nangwa sate byaalo byapusanapusana ba Kebiteleka. Nalombelela muntu yense ukomvwa yuwe tepu, awo wabula kwikala na luketekelo lwa Bumi bwa Peenape, ao wabula lubatizhilo lwa Mupashi Wazhila, lekai Ekile mu michima yabo. Kiswishai kye, Nkambo.


²³⁶ Kabiji lekai Ami, inge kechi Nebamonapo mu buno bumi ne, inge Na abuka kubushiya bwayoya Ntanda, lekai bakanyeme ne kukwata (kabiji ne Amiwa ke bakwate, kabiji ne abo, tukabijike mba, “Wawama mulongo!” ku umo ne mukwabo), ne kwaamba mba, “Naumvwine tepu obe pa Efisesa, Lesa byo etutongwejile jimo kuya ku Bumi Bwape, kabiji kyajinga pa yewa tepu po Natambwile Jiwi ja kwa Lesa kabiji babikilwe katetesho na Mupashi Wazhila mu Bufumu bwa Lesa.” Kiswishai kye, Taata.

²³⁷ Bukai bonse bakolwa ne bamanyikwa. Ikalai na lukumo kwi Anweba bene mambo twipana byonse bye kwi Anweba mu Jizhina ja Yesu, Mwaana Wenu. Amena.

²³⁸ Mujipo bamo muno bakolwa kabiji babena kukeba kubikwa maboko pe abo amba balombelelwe? Mwakonsha kusutulako maboko enu nyi? Kijitu bulongo. Mwakonsha kwenda mu kuzhindama, pano, ku kitapisho konkakuno, kabiji imanai pa kakimye kacheche, kimye Mulongo Neville ubena kwiya na wanji . . .

²³⁹ Oo, akye kyamweka nobe, kulombelela bakolwa, kijitu—kijitu nobe kwikila panshi apo po mwayuka apo mwaimana, kine. Lesa wayuka pa byonse bye.

²⁴⁰ Inge Naumvwa awa lwimbo . . . Vulukai, inge mwaikala na bumi kimye kyo Nkaya, kanyimbilali yuwe: *Konka Kuketekelatu*. Vulukai, Amiwa kechi nafwa ne, Amiwa kechi kekala kwalepa ne anweba ne kasa telekako. Amiwa kechi nakonsha kufwa ne; Yesu wampele Bumi Bwapeenape; ukasangula amiwa mujuba jikapelako; Amiwa kemumona. Kabiji inge waya, Amiwa kaketekela musangotu umo kwi obewa. Naketekela mba tukamonang’ana umo ne mukwabo jibiji.

²⁴¹ Ubena nkutala, awe inetu wawama waimana papo na suki yavwi. Obewa wi Mwinakilishitu? Wayuzhiwamo na Mupashi Wanji, kupembelela kwiya Kwanji, kwimanatu muno na kupembelela Bwato bwiye. Amena. Oo, nyenga . . . 

KWALULWABUBANA 4 KDE60-0522E
(Adoption 4)

LUFUNJISHO LWALONDAKA LWA KWALULWABUBAANA

Ino Mbila na Mulongo William Marrion Branham, yalupwilwe patanshi mu Kizungu pa Mulungu mabaanga abufuku, Ndoolo 22, 1960, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org